

Маҳалла

ИЖТИМОЙ-СИЁСИЙ,
МАЪНАВИЙ-МАЪРИФИЙ ГАЗЕТА

#14 (2100) | ШАНБА, 8 АПРЕЛЬ 2023 ЙИЛ

WWW.XOLISNAZAR.UZ

@XOLIS_NAZAR

@XOLISNAZAR



**БОШ ҚОМУСИМИЗГА
ЎЛИМ ЖАЗОСИНИНГ
МАН ЭТИЛИШИГА ОИД
НОРМАНИНГ КИРИТИЛИШИ
ИНСОННИНГ ЭНГ ОЛИЙ
ҲУҚУҚИ — ЯШАШ
ҲУҚУҚИНИ ҲАР ДОИМ
КАФОЛАТЛАШ БЎЙИЧА
ДАВЛАТНИНГ ҚАТЪИЙ
ПОЗИЦИЯСИНИ АНГЛАТАДИ**

ХАЛҚ КОНСТИТУЦИЯСИ БИЛАН ХАЛҚЧИЛ ДАВЛАТ САРИ!

**«ШАҲАР
АВТОМОБИЛЛАР ЭМАС,
БАЛКИ ПИЁДАЛАР УЧУН»**




7

**ИПОТЕКА
КРЕДИТИНИ ОЛИШ
ОСОНЛАШАДИ**



14

**СЕНТОБ
САЙЁҲЛАРНИНГ СЕВИМЛИ
МАСКANIГА АЙЛАНГАН**



15

**ФИТР САДАҚАСИ
КИМЛАРГА, ҚАЧОН ВА ҚАНЧА
МИҚДОРДА БЕРИЛАДИ?**



16

«БУ ЙИЛ ИШСИЗЛИКДАН ХОЛИ ХУДУДГА АЙЛАНМИЗ»



МАҲАЛЛА МАРКАЗИНИНГ 2 СОТИХЛИК ТОМОРҚАСИ МАВЖУД. БУ ЕРДАН ЙИЛ ДАВОМИДА УНУМЛИ ФЙДАЛАНИЛАДИ. ЭНГ МУҲИМИ, ТОМОРҚАДА ЕТИШТИРИЛГАН МАҲСУЛОТЛАР ЭҚТИЁЖМАНД ОИЛАЛАРГА ТАРҚАТИЛАДИ

Ҳар бир инсон, у қайси ёшда бўлмасин, қайси соҳа ёки лавозимда ишламасин, ота-онаси, фарзандлари олдида, ўз Ватани, маҳалласи, келгуси авлодлар олдида ҳалол ва виждонан қилган меҳнатининг ҳосилини, ўз хизматининг тан олинисини, кадр топганини кўрар экан, бундай инсон ўзини, албатта, бахтли деб ҳис қилади. Буни Маҳалла тизими ходимлари кун муносабати билан тақдирланган, тизимда узоқ йиллар меҳнат қилган, маҳалласи билан бир тану бир жонга айланган бир гуруҳ йиғин фаоллари мисолида ҳам кўриш мумкин.

Ана шундай фидойи инсонлар қаторида Самарқанд вилояти Пастдарғом туманидаги «Қатортерак» маҳалла фуқаролар йиғини раиси Олтиной Қудратова ҳам бор. 2016 йилдан буён мазкур маҳаллага раҳбарлик қилаётган Олтиной опа «Маҳалла ифтихори» кўкрак нишони билан тақдирланди. Айтиш керакки, бу мукофот унга шунчаки берилмади, маҳалладаги ободлик, оилалардаги тинчлик, йиғиндаги ҳамжиҳатлик, муаммоларни биргалликда бамаслаҳат ҳал қилиш, ҳар бир мурожаатни эътиборсиз қолдирмаслик, энг муҳими, маҳалла ишончига эришганлик бунга замин яратди.

— Маҳалла раиси ҳудуд аҳолисининг турмуш тарзи, яшаш шароитига масъул шахс ҳисобланади, — дейди Олтиной Қудратова. — Энди ҳамма масала, аввало, маҳаллада ҳал бўлсагина, одамлар рози бўлади, маҳалла раисига ишончи ортади. Шу боис маҳаллада ресурс ва имкониятларни кўпайтириш, моддий таъминотини яхшилаш чоралари кўрилмоқда, ваколати кенгайтириляпти. Шундан келиб чиқиб, айтиш мумкин, ҳоким ёрдамчиси, хотин-қизлар фаоли, ёшлар етакчиси ва профилактика инспектори билан ҳамкорликда ҳар қандай масала маҳалланинг ўзида ечим топишига эътибор қаратяпти. Ҳар бир йиғин фаоли аҳоли дардини ўзиники, деб билади.

Айтиш керакки, маҳаллада-

ги қатор ижтимоий муаммолар одамларни анчадан буён қийнаб келарди. Мисол учун, йиғин аҳлининг аксариятини тоза ичимлик сув муаммоси ўйлантирарди. О.Қудратова ташаббуси билан кейинги йилларда 2 та сув иншооти қурилди. Электр энергиясидаги узилишларнинг олдини олиш мақсадида 100 дона эски симёғоч янги бетон устунларга алмаштирилди. Марказий кўчаларга тунги ёритиш чироқлари ўрнатилди. Қишда лой, ёзда чанг бўлиб ётадиган қабристонга элтувчи 2,5 километрлик йўл шағаллаштирилди. Қолаверса, йўллар ёқасига 6 минг туп манзарали дарахтлар экилди. Бу ишларнинг барчасини фермер ва тадбиркорлар, ташаббускор аҳоли амалга оширди.

Эътиборлиси, маҳаллада ҳар бир хонадон томорқадан самарали фойдаланади. Бу жараёнда йиғин фаолларининг ўзлари аҳолига ўрнатилган. Яъни маҳалла марказининг 2 сотихлик томорқаси мавжуд. Мазкур ердан йил давомида унумли фойдаланилади. Мисол учун, ўтган йили кузда тўқсонбости экин сифатида саримсоқпиез экилди. Кўклам келгач, гул ва сабзавот экинлари уруғи қадалди. Энг муҳими, томорқада етиштирилган маҳсулотлар эҳтиёжманд оилаларга тарқатилади.

Йиғинда аҳолининг ижтимоий ҳимоясига алоҳида эътибор қара-

тилади. «Темир дафтар», «Аёллар дафтари», «Ёшлар дафтари»га киритилган фуқаролар билан доимий мулоқот йўлга қўйилган. Уларга имтиёзли кредитлар ажратиш, субсидиялар бериш, шу орқали ўз бизнесини йўлга қўйишга кўмаклашиш ишларида маҳалла раиси бош-қош.

«Ёшлар дафтари»га киритилган Мафтуна Уринова ота-онасининг бевақт ўлими сабаб 15 ёшида бир укаси ва бир синглиси билан етим қолди. Уларга ҳоласи бош-қош бўлди. Мафтуна мактабни битириб, ўз аравасини ўзи тортишга аҳд қилди. Бугунги кунда укаси ва синглисига ҳам оналик, ҳам оталик қилмоқда. У айтиш пайтда тикувчилик билан шуғулланяпти.

— Болалигимдан бу хунарга қизиқардим, — дейди Мафтуна Уринова. — Аммо менда тикув машинаси йўқ эди. Маҳалла фаоллари тавсияси билан «Ёшлар дафтари»га киритилдим ва менга замонавий тикув машинаси ажратилди. Ҳозирда буюртма асосида аёллар учун кўйлақлар тикяпман. Маҳалла маркази биносида ўқув курси ташкил этилган. Раисимиз Олтиной опанинг таклифи билан тикувчилик сирларини чуқурроқ ўрганиш мақсадида ушбу марказга қатнашман. Маҳалла фаолларидан миннатдорман. Бизни ёлғизлатиб қўйгани йўқ.

Албатта, ютуқлар, муваффақиятлар билан бир қаторда маҳаллада ҳали қилиниши керак бўлган

ишлар жуда кўп. Жумладан, 100 дан зиёд хонадонни тоза ичимлик сув билан таъминлаш, 200 дан ортиқ эскирган симёғочларни янги-ларига алмаштириш, тадбиркорлар ва хунармандлар сафини кенгайтириб, янги иш ўринлари яратиш — маҳалла фаоллари олдида турган асосий вазифалардир.

— Маҳалладаги «бешлик» фаолияти барча масалаларни тизимли ҳал этиш имконини бермоқда, — дейди Олтиной Қудратова. — Албатта, барча муаммо бирдан ечим топиб қолмайди. Бироқ уларни яратиб келиб ҳеч ким ҳал этиб бермаслигини ҳам биламиз. Шу боис берилган имкониятлардан фойдаланиб, маҳалланинг ўзида иш ўринлари яратиш, одамларнинг уйдан узоқлашмаган ҳолда ишли бўлишини таъминлаш чораларини кўряпмиз. Насиб этса, бу йил «Ишсизликдан холи ҳудуд»га айланиш ниятимиз бор. Ҳамжиҳат бўлса, бунга, албатта, эришамиз.

Сирасини айтганда, маҳалла раиси йиғиндаги барча ташаббусларга бош-қош. Ҳар бирининг ижросига эътибор қаратган. Ўз навбатида йиғин аҳли ҳам Олтиной опадан мамнун, унинг фидойлиги, жонқуярилигини қадрлайди. Бундай ҳамжиҳатлик қарор топган масканда одамлар бугундан рози, эртасига ишончи мустаҳкам бўлиб яшайди.

Тўлқин СИДДИҚОВ.

МАҲАЛЛАДА НИМА ГАП?

Носоз йўллар тўлиқ таъмирланяпти

Аҳоли талаб ва мурожаатларига асосан Бухоро шаҳридаги «Лоша» маҳалласининг ички йўлларини асфальтлаштириш мақсадида 9,8 млн. сўм маблағ ажратилган. Айтиш пайтда белгиланган дастурга кўра, маҳалланинг ички автомобиль йўлларининг 19,8 км қисми асфальтлаштирилади.

Худди шундай хайрли ташаббус «Ҳавзи Нав» маҳалласида буй кўрсатяпти. 600 млн. сўм маблағ эвазига маҳалланинг 1 км.дан ортиқ носоз йўллари тўлиқ таъмирланяпти.

Бунёдкорлик нафаси «Имом Ал-Бухорий» маҳалласини четлаб ўтаётган йўқ. Ушбу маҳалланинг Ҳавзи Қози Калон, Ҳавзи Лесақ, Тагбанбофон, Афросиёб, Мирфаёз, Хўжа Азизон кўчалари таъмири учун 1 млрд. 800 млн. сўм маблағ ажратилган.

Ушбу маҳаллаларнинг 3 км. 732 м. йўл қисмини таъмирлаш кўзда тутилган бўлиб, шундан 1 км. 400 м. қисми бетонлаштирилади, 2 км. 332 м. йўл қисмига асфальт қопланади.

Бу жараён «Шербудин» ва «Кўкалдош» маҳаллаларида қизғин давом этмоқда.





ЭНГ БИРЛАМЧИ ҲАЁТИЙ МУАММОЛАР — АСОСИЙ ЭЪТИБОРДА

ҚАДИМ ТАРИХГА ЭГА «ЖАНГҒОҲ» МАҲАЛЛАСИДА ҚУРИЛИШ ИШЛАРИ АВЖИДА. БУ ЕРДАГИ БЎШ МАЙДОНДА «ЖАНГҒОҲ» МАҲАЛЛА ФУҚАРОЛАР ЙИҒИНИ МАРКАЗИ БУНЁД ЭТИЛЯПТИ

Давлатимиз раҳбари топшириғига асосан тузилган Республика ишчи гуруҳининг икки ой аввал «Оққўрғон тажрибаси» асосида пойтахт туманларидаги фаолияти давомида аҳолининг электр ва иссиқлик энергияси, табиий газ, ичимлик сув билан боғлиқ энг бирламчи ҳаётий масалаларни ҳал қилишга асосий эътибор қаратилган эди. Аини шу тажриба билан барча туман-шаҳарларда бу борадаги тизимли масалаларни ҳал қилиш бўйича аниқ вазифалар белгиланган эди.

Айни кунларда Президент Халқ қабулхоналари, Миллий гвардия, вазирликлар, кўмиталар, ташкилотлар, секторлар раҳбарларидан иборат Республика ишчи гуруҳи пойтахтимишнинг барча туманида мазкур вазифалар ижросини ўрганапти.

Мирзо Улуғбек тумани «Оқибат» маҳалласи аҳолиси мурожаатлари асосида ҳудуддаги анча зўриқиб ишлаётган 400 киловольтли трансформатор 630 киловольт ампер қувватдаги янғисига алмаштирилди. Бу билан 400 та хонадонда электр таъминоти барқарорлашиб, кучланиш меъёрига тушади, йўқотишлар 10 фоизга камаяди. Ёки Шайхонтоҳур тумани Лабзак кўчасидаги катта кучланишга эга электр тармоқлари янгиланаётгани билан «Жангғоҳ», «Шайхонтоҳур», «Лабзак», «Коҳ ота» маҳаллаларининг электр таъминоти яхшиланади. Умуман, Республика ишчи гуруҳининг Тошкент шаҳридаги фаолияти давомида 9 та трансформатор ўрнатилиб, 48,6 км. электр тармоғи тортилди.

Янғихаёт тумани «Янги дархон» маҳалласида 24 км. масофага бетон устунлару юқори кучланишли 6 та трансформатор ўрнатилиши билан 600 та оиланинг уйи ҳам, кўнгли ҳам чароғон бўлди. Дарвоқе, бу маҳаллада «Янги Ўзбекистон» массивлари барпо этиляпти. Қулай инфратузилма, болалар учун яратилаётган шарт-шароит, янгидан қурилаётган мактаб-боғчалар, савдо ва хизмат кўрсатиш объектлари, умуман, бунёдкорлик ва ободлик ҳаракати замирида «Инсон қадрли учун» ғояси мужассам.

Яна бир ибратли жиҳат: қисқа вақтда Янғихаёт туманидаги 20 дан ортиқ тадбиркорлик субъекти ўз корхоналарига қуёш панеллари ўрнатди. Бу билан ҳар бир корхона ойига ўртача 100 кВт. электр энергиясини иқтисод қияпти.

Кишининг аччиқ сабоғидан сўнг Янғихаёт туманидаги кўп қаватли 55 та уй ертўласидаги муҳандислик-коммуникация тармоғи тўлиқ янгиланди ва бу ишлар изчил давом эттириляпти.

Дастурга асосан «Бешкапа»

маҳалласи Буюк ипак йўли кўчасида жойлашган ётоқхона шаклидаги уй тўлиқ таъмирланиб, 128 та хонадон эгалари муносиб турмуш кечириши учун етарлича шароит яратилади.

Янғихаёт туманининг «Хушнуд» маҳалласи аҳолиси яқин-яқингача поликлиника йўқлигидан қийналиб келарди. Мурожаатлардан сўнг жорий йил дастурлар асосида бу масала ҳал қилиниб, маҳаллада 200 ўринли замонавий тиббиёт муассасаси қуриш ишлари бошлаб юборилди.

Шайхонтоҳур туманининг қадим тарихга эга «Жангғоҳ» маҳалласида қурилиш ишлари авжида. Бу ердаги бўш майдонда «Жангғоҳ» маҳалла фуқаролар йиғини маркази бунёд этиляпти.

Учтепа тумани «Бирлик» маҳалласи Катта Хирмонтепа кўчасида бунёд этилган гўзал сайилгоҳ, саломатлик йўлаги эса маҳалла аҳолининг димоғини чоғ қияпти.

Халқ билан мулоқотнинг «Оққўрғон тажрибаси», аввало, ҳақиқий ёрдамга муҳтож инсон-

ларни топиб, уларга кўмак бериш дегани. Чилонзор туманидаги Халқ қабулхонаси, секторлар ва маҳалла вакиллари ўрганишларидан сўнг 2-гуруҳ ногирони Василя Вакилова каби оғир ижтимоий аҳволдаги 30 дан ортиқ беморнинг жарроҳлик амалиёти ўтказиш ва даволаниш харажатлари, Роза Салмонова каби бир қатор эҳтиёжманд талабаларнинг ўқув шартнома пуллари ички имкониётлар ҳисобидан тўлаб берилди.

Учтепа тумани «Тепакўрғон» маҳалласида яшовчи 1-гуруҳ ногирони Гулсия Жабборова сингари оғир ижтимоий аҳволдаги кўплаб инсонларнинг хонадонларида ички имкониётлар ҳисобидан таъмирлаш ишлари олиб бориляпти.

Давлатимиз раҳбари топшириғи асосида тузилган Республика ишчи гуруҳининг пойтахтимишдаги фаолияти давомида аниқланган 44 минг 300 дан зиёд масаланинг қарийб 25 минг 680 таси ҳал қилинди, қолганлари бўйича амалий ишлар давом эттириляпти.

Мансур АБДУСАТТОРОВ.

МАҲАЛЛАДА НИМА ГАП?

Хонадонларда электр таъминоти яхшиланади

Давлатимиз раҳбарининг 2022 йил 25 октябрдаги «2022-2023 йилларда маҳаллалар инфратузилмасини янада яхшилаш бўйича қўшимча чора-тадбирлар тўғрисида»ги қароридан белгиланган амалий тадбирлар натижасида Ўзбекистон туманидаги қишлоқ ва маҳаллалар инфратузилмасидаги энг долзарб масалаларни тизимли ҳал этилмоқда.

Маҳалламизда электр таъминотини яхшилаш, тизимдаги мавжуд муаммоларни бартараф этиш мақсадида 7 та кўчага 77 дона янги темир-бетон таянчлари ҳамда қуввати 160 кВА. бўлган бир дона янги трансформатор ўрнатилди.

Умумий қиймати 412 миллион сўм дея белгиланган мазкур лойиҳа доирасида туман энергетиклари айни кунларда ҳудудда 2 минг 100 метрдан зиёд замонавий турдаги кабеллар орқали янги ҳаво тармоқлари тортишмоқда. Мазкур ишлар натижасида маҳалладаги 120 га яқин аҳоли хонадонларида электр таъминоти яхшиланади.

Ҳасанжон ТҮЙЧИЕВ,
Ўзбекистон туманидаги «Кудаш» маҳалласи раиси.



ҲОКИМ ЁРДАМЧИЛАРИ ИСЛОҲОТЛАР ТАЯНЧИГА АЙЛАНИБ БОРЯПТИ



АНИҚЛАНГАН МУАММОЛАРНИ ҲАЛ ЭТИШ УЧУН 2022 ЙИЛДА ЖАМИ 12,5 ТРЛН. СЎМ МИҚДОРИДА МОЛИЯВИЙ ИНСТРУМЕНТЛАР МАНБАЛАРИ ШАКЛЛАНТИРИБ БЕРИЛДИ. ХАТЛОВ АСОСИДА ҲАР БИР МАҲАЛЛА БЎЙИЧА «ЙЎЛ ХАРИТА»ЛАРИ ИШЛАБ ЧИҚИЛДИ

Хабарингиз бор, давлат раҳбари ташаббуси билан 2022 йилдан бошлаб, ҳар бир маҳаллада ҳоким ёрдамчиси лавозими жорий этилиб, фаолиятини самарали ташкил этиш ва баҳолаб бориш мақсадида «Онлайн маҳалла» платформаси ишга туширилди. Ўз навбатида «www.online-mahalla.uz» электрон манзилига жойлаштирилган ушбу платформа тегишлилиги бўйича 35 та вазирлик ва идоралар маълумотлари базаси билан интеграция қилинди. Ҳозирги кунга келиб, бу барча ҳоким ёрдамчилари, 300 дан зиёд республика вакиллари, 208 та туман марказлари ва туман ҳокимликлари, 14 та ҳудудий бошқарма ва вилоят ҳокимликларининг фаолиятини рақамлаштириш имкониятини берди.

Айтиш керакки, Президентимиз Шавкат Мирзиёевнинг «Маҳаллабай» ишлаш тизимини амалиётга жорий этиш тўғрисидаги ташаббуси ҳудудлардаги муаммо ва ечимини кутаётган масалаларнинг имкон қадар тезроқ бартараф бўлишига мустаҳкам ва ишончли замин бўлмоқда. Эътиборлиси, бу тизим ҳар бир муаммога индивидуал ёндашишни талаб қилади. Яъни, аҳоли турар-жойларидаги мавжуд ҳолатни маҳаллабай ўрганиш орқали шу ҳудудда яшаётган хонадонлар эгаларини тадбиркорликка кенг жалб этиш, уларни қўшимча даромад топишга ундаш, аёллар ва ёшларга ҳеч бўлмаганда уйда туриб, бирон бир юмуш билан шуғулланиш учун шароит яратиш, ташаббускор тадбиркорларнинг истиқболли ғоя ва лойиҳалари рўёбга чиқиши учун имконият яратмоқда. Мамлакат тараққиётида жуда ноёб бўлган бу тизимни тўғри йўлга қўйиш ва амалга ошириш — биринчи галда ҳоким ёрдамчиларига боғлиқ.

Ҳоким ёрдамчилари 2022 йил биринчи босқичда — маҳаллардаги 6,9 млн. хонадонларни хатловдан ўтказди. Шу асосида оилаларнинг ижтимоий-иқтисодий аҳволига кўра 4 та тоифага ажратиб олинди. Аҳолининг касб-хунарга ўқиш, тадбиркорлик билан шуғулланиш, кредит олиш ва бошқа истаклари ўрганиб чиқилди. Муаммоларни ҳал этиш учун ўтган йилда жами 12,5 трлн. сўм миқдориди молиявий инструментлар манбалари шакллантирилиб, ҳар бир маҳалла бўйича «йўл хариталари» ишлаб чиқилди. Натижада 2022 йил мобайнида 1,4 млн. нафар аҳоли доимий ва мавсумий ишга жойлаштирилди, 1,1 млн. нафари ўзини ўзи банд қилган шахс сифатида рўйхатга олинди, 101 минг нафари яқка тартибдаги тадбиркорликка (ёлланма ишчилари билан биргаликда) ва 166 минг

нафари ҳақ тўланадиган жамоат ишларига жалб қилинди, 430 минг нафар фуқарога ижара асосида ер берилди.

Оилавий тадбиркорлик дастури доирасида тавсияномалар асосида 425 мингта лойиҳага қарийб 10 трлн. сўмлик кредит ажратилди. Аҳолини тадбиркорликка жалб қилиш, уларга меҳнат қуроллари ва асбоб-ускуналари олиб бериш бўйича 75 минг нафар ишсиз фуқарога 263,0 млрд. сўмлик субсидиялар тақдим этилди. 234 минг нафар фуқаро касб-хунарга ва тадбиркорликка ўқишга йўналтирилиб, 200 минг нафари «Ишга марҳамат» мономарказлари ва бошқа нодавлат таълим муассасаларида ўқишни тамомлади. 50 мингта «маҳаллабай» микролойиҳаларнинг 49 мингтаси ишга туширилиб, 239 мингга яқин иш ўринлари яратилди. Маҳаллаларда амалга оширилган ишлар натижасида 90 мингта юридик ва 96 мингта яқка тартибдаги тадбиркорлик субъектлари давлат рўйхатидан ўтказилди.

Шунингдек, аҳоли жон бошига даромадларнинг ўзгариши бўйича кўмак кўрсатилган 803 мингта оилалардаги иқтисодий ўзгаришлар кузатувга олинди. Дастлабки натижаларга кўра, ўрганилган хонадонларнинг 95 фоизиди даромадлар ошгани кузатилди.

Шуни ишонч билан айтиш керакки, ўтган вақтдаги тажрибага асосан, 2023 йилда бу ишлар муттасил давом этади. Жумладан, режага кўра, 1,4 млн. нафар ишсиз аҳолини доимий ва мавсумий иш ўринларига жойлаштириш, 1,1 млн. нафар фуқароларни ўзини ўзи банд қилган шахс сифатида рўйхатга олиш, 83 минг нафарини хунардандчиликка, 110 минг нафарини яқка тартибдаги тадбиркорликка (ёлланма билан бирга) ва 135 минг нафарини жамоат

ишларга жалб қилиш белгиланган. 158 минг нафар фуқаро (шундан касб-хунарга 115 минг нафар ва тадбиркорликка 43 минг нафар фуқаролар) ўқитилади. Оилавий тадбиркорлик дастурлари доирасида 400 мингга яқин лойиҳаларга 13 трлн. сўмлик имтиёзли кредитлар ҳамда 100 минг ишсиз фуқарога 450,0 млрд. сўмлик 20 та турдаги субсидиялар ажратиш кўзда тутилган.

Режага кўра, 40 мингта инвестиция дастурига киритилмаган «маҳаллабай» микролойиҳалар амалга оширилиб, 200 мингдан ортиқ янги иш ўринлари яратилади. Бу билан эса, 2023 йилда маҳаллаларда 92 мингта юридик ва 98 мингта яқка тартибдаги тадбиркорлик субъектлари давлат рўйхатидан ўтказилади.

Жорий йилнинг ўтган даври мобайнида юқоридаги режалар босқичма-босқич ҳаётга татбиқ этилмоқда. Ҳоким ёрдамчилари томонидан 4,2 млн. (56,5 фоиз) хонадонлар хатловдан ўтказилди. Эътиборлиси, бу йилги хатловда 70 фоиз маълумотлар интеграция орқали турли идоралардан олинган расмий маълумотлар асосида шакллантирилмоқда. Умумий қиймати 8 трлн. сўмлик 20 мингдан ортиқ кичик ишлаб чиқариш ва хизмат кўрсатиш йўналишидаги микролойиҳаларнинг манзилли рўйхати тузилди. Ушбу лойиҳалар бўйича лойиҳа ташаббускорларига йил давомида амалий ёрдамлар кўрсатиш натижасида 100 мингга яқин янги иш ўринлари яратилиши кўзда тутилган. Ўтган 2 ой давомида микролойиҳалардан 545 таси ишга туширилиб, 2 минг киши ишли бўлди.

Жорий йилнинг 1 март ҳолатига 459 минг нафар фуқаронинг даромадли меҳнат билан бандлиги таъминланди. Уларнинг 137 минг нафари доимий иш жойларига

жойлаштирилиб, 176 минг нафари ўзини ўзи банд қилган шахс сифатида рўйхатга олинди. 15 минг нафари яқка тартибдаги тадбиркорликка (ёлланма билан бирга) ва 7 минг нафари ҳақ тўланадиган жамоат ишларига жалб қилинди, 124 минг нафар фуқарога ижара асосида ер ажратилди.

Оилавий тадбиркорлик дастури доирасида ҳоким ёрдамчилари тавсияномалари асосида 21 502 та лойиҳага 485 млрд. сўмлик кредитлар ажратилди. Аҳолини тадбиркорликка жалб қилиш, уларга меҳнат қуроллари ва асбоб-ускуналари олиб бериш бўйича 4 550 та фуқарога 14,7 млрд. сўмлик субсидиялар берилди. Аҳолига ерларни ижарага бериш мақсадида 70 минг гектар қишлоқ хўжалиги ер майдонлари 201,6 мингта лотларга бўлиниб, электрон танлов(аукцион) га чиқарилди, 125,4 мингта лот (62 фоиз) бўйича танлов ғолиблар аниқланиб, 43,4 минг гектар ер майдонлари фуқароларга тақдим этилди. Касб-хунарга ва тадбиркорлик кўникмаларига ўқишга 26 минг нафар фуқаро йўналтирилиб, «Ишга марҳамат» мономарказлари ва бошқа нодавлат таълим муассасаларида ўқитилмоқда. Маҳаллаларда 26 та микромарказлар ишга туширилиб, 209 та янги иш ўринлари яратилди. 14 мингта юридик ва 13 мингта яқка тартибдаги тадбиркорлик субъектлари давлат рўйхатидан ўтказилди.

Бир сўз билан айтганда, ҳоким ёрдамчилари маҳалла ичига кириб бориб, аҳолини ўйлантираётган ва ташивлантираётган муаммоларга ечим топишмоқда. Бу саъй-ҳаракатлар эса, эришилган натижаларда яққол кўзга ташланмоқда.

Мирзоҳид УБАЙДУЛЛАЕВ,
Маҳаллабай ишлаш ва тадбиркорликни ривожлантириш агентлиги директори.

Кейинги йилларда мамлакатимизда хотин-қизларга бўлган эътибор тубдан кучайди. Уларнинг ҳуқуқ ва қонуний манфаатларини ҳимоя қилиш, иқтисодий, ижтимоий ва сиёсий фаоллигини ошириш, соғлиғини сақлаш, касбга ўқитиш ва бандлигини таъминлаш, эҳтиёжманд хотин-қизларни ижтимоий қўллаб-қувватлаш борасида самарали ишлар йўлга қўйилди.

ТАЖОВУЗ ВА ЗЎРАВОНЛИК УЧУН ЖАЗО ОҒИР БЎЛАДИ

ИЛГАРИ ВОЯГА ЕТМАГАНЛАРГА НИСБАТАН ЖИНСИЙ ЖИНОЯТЛАРНИ СОДИР ЭТГАН ШАХСЛАРНИНГ БОЛАЛАРГА ТАЪЛИМ, ТАРБИЯ БЕРИШ, УЛАРНИ СОҒЛОМЛАШТИРИШ, БОЛАЛАР СПОРТ, ИЖОДИЙ ТАШКИЛОТЛАРДА ИШЛАШНИ ТАҚИҚЛОВЧИ НОРМА КИРИТИЛАДИ

Бирок, шу билан бирга, бугунги кунда хотин-қизлар ва болаларнинг ҳуқуқлари, эркинликлари ҳамда қонуний манфаатларини ишончли ҳимоя қилиш бўйича ҳуқуқни қўллаш амалиётида кўплаб муаммолар юзага келяпти. Жумладан, хотин-қизлар ва болаларнинг ҳуқуқларига даҳл қилувчи жиноий қилмишлар учун мутаносиб санкциялар белгиланмаган, шахс ҳаётининг сир тутиладиган томонларини акс эттирувчи, шаъни ва қадр-қимматини камситувчи маълумотларни ошкор қилганлик учун жавобгарлик назарда тутилмаган.

Шу билан бирга, таъйиқ ва зўравонликдан жабрланувчига давлат ҳимоясини тақдим этувчи ордер муддати (30 кун) хотин-қизларнинг ҳуқуқ ва қонуний манфаатларини етарли даражада ҳимоя қилиш имконини бермайди. Алимент тўлолмаган шахсларга жазо сифатида жарима тайинланиши янада моддий қийинчиликларга олиб келмоқда.

Юқоридагилардан келиб чиқиб, «Хотин-қизлар ва болалар ҳуқуқлари, эркинликлари ҳамда қонуний манфаатларини ишончли ҳимоя қилиш тизимини янада такомиллаштириш муносабати билан Ўзбекистон Республикасининг айрим қонун ҳужжатларига ўзгартиш ва қўшимчалар киритиш тўғрисида»ги қонун лойиҳаси ишлаб чиқилди. Мазкур ҳужжат лойиҳаси Олий Мажлис Қонунчилик палатасида муҳокама қилиниб, қабул қилинди. 6-7 апрель санасида бўлиб ўтган Сенатнинг навбатдаги ялпи

йиғилишида қонун сенаторлар томонидан тасдиқланди.

Айтиш керакки, қонун лойиҳаси билан номусга тегиш ёхуд жинсий эҳтиёжни ғайритабиий усулда қондириш, шахсни жинсий алоқа қилишга мажбурлаш, ўн олти ёшга тўлмаган шахс билан жинсий алоқа қилиш, уларга нисбатан уятсиз-бузуқ ҳаракатларни содир этиш, вояга етмаган шахс иштирокидаги порнографик маҳсулотни тайёрлаш ва тарқатиш билан боғлиқ жиноий хатти-ҳаракатлар учун **жазо чоралари оғирлаштирилмоқда**. Хусусан, жазодан муддатидан илгари шартли озод қилиш ёки жазони енгилроғи билан алмаштириш тариқасидаги инсонпарварлик актлари қўлланилмаслиги, тамом бўлмаган жиноятлар учун жазо тайинлашда енгиллик берилмаслиги назарда тутилмоқда.

Бундан ташқари, аёлни ҳомиласини сунъий туширишга мажбурлаш (33 млн. сўмдан 66 млн. сўмгача жарима ёки 3 йилдан 5 йилгача муайян ҳуқуқдан маҳрум қилиш ёхуд 300 соатдан 360 соатгача мажбурий жамоат ишлари ёки 2 йилдан 3 йилгача ахлоқ тузатиш ишлари), номусга тегиш ёхуд жинсий эҳтиёжни ғайритабиий усулда қондириш (1-қисми 5 йилдан 8 йилгача озодликдан маҳрум қилиш; 2-қисми 8 йилдан 10 йилгача озодликдан маҳрум қилиш), шахсни жинсий алоқа қилишга мажбур этиш (1-қисми 300 соатдан 480 соатгача мажбурий жамоат ишлари, 2 йилдан 3 йилгача ахлоқ тузатиш ишлари, 1 йилдан 3 йилгача озодликни

чеклаш ёки озодликдан маҳрум қилиш; 2-қисми 3 йилдан 5 йилгача озодликни чеклаш ёки озодликдан маҳрум қилиш, оғирлаштирувчи ҳолатларда 5 йилдан 8 йилгача қамоқ жазоси), 16 ёшга тўлмаган шахс билан жинсий алоқа қилиш (2 йилдан 3 йилгача озодликни чеклаш ёки озодликдан маҳрум қилиш. Оғирлаштирувчи ҳолатларда – 5 йилдан 8 йилгача озодликдан маҳрум қилиш), унга нисбатан уятсиз-бузуқ ҳаракатлар қилиш (1-қисми 2 йилдан 3 йилгача озодликдан чеклаш ёки озодликдан маҳрум қилиш; 2-қисми 3 йилдан 5 йилгача озодликдан чеклаш ёки озодликдан маҳрум қилиш. Агар ўша ҳаракатлар зўрлик ишлатиб ёки қўрқитиб содир этилган бўлса – 5 йилдан 8 йилгача озодликдан маҳрум қилиш) учун жазо чоралари оғирлаштирилмоқда.

Ногиронлиги бўлган шахсларга, вояга етмаганларга нисбатан жинсий даҳлсизликка ва эркинликка қарши жиноятларни содир этганлик, шунингдек, ушбу жиноятларни жабрланувчини тарбиялаш, ўқитиш ёки унга ғамхўрлик қилиш мажбуриятларини бажараётган шахс томонидан содир этиш учун жавобгарлик кучайтирилади.

Яна бир муҳим янгилик – қонун билан «оилавий (маиший) зўравонлик», яъни хотинига ёки эрига, собиқ хотинига ёхуд собиқ эрига, бир рўзғор асосида биргаликда яшаётган шахсга ёки умумий фарзандга эга бўлган шахсга нисбатан содир этилган зўравонлик учун тегишинча маъмурий ҳамда жиноий жавобгар-

лик чоралари белгиланяпти.

Шахс ҳаётининг сир тутиладиган томонларини акс эттирувчи, шаъни, номусини камситувчи маълумотларни ошкор қилганлик (132 млн. сўмдан 198 млн. сўмгача жарима ёки 360 соатгача мажбурий жамоат ишлари ёхуд 3 йилгача ахлоқ тузатиш ишлари), жамоат жойларида шахсга шилқимлик қилиш: унинг қадди-қоматини шахвоний мазмунда тасвирлаш, шу мазмундаги сўзлар билан чақириш, изоҳлаш, қиёслаш, шахвоний майлини кўрсатувчи ҳаракатлар қилиш (660 минг сўмдан 1 млн.320 минг сўмгача жарима), вояга етмаган болаларига васий ёки ҳомий тайинлаш борасидаги мажбуриятларини бажармаслик каби ҳаракатлар учун жавобгарлик киритилади.

Шу билан бирга, вояга етмаганларга нисбатан жинсий зўравонликни содир этган шахсларнинг болаларга таълим, тарбия бериш, шунингдек болалар билан бевосита ишлашни назарда тутувчи фаолият турлари билан шуғулланишини тақиқлаш ҳамда бу турдаги жиноятларни содир этган шахсларнинг рўйхатини юритиш кўзда тутилмоқда.

Ён-атрофимизда алимент тўловини пайсалга солиб ёхуд тўлолмай келаётган фуқаролар кам эмас. Алимент тўлолмаган шахсларга жазо сифатида жарима тайинланиши янада моддий қийинчиликларга олиб келмоқда. Шу боис алимент мажбуриятлари бажарилишини таъминловчи чора сифатида **ҳақ тўланадиган жамоат ишларига мажбурий равишда**

жалб қилиш каби янги маъмурий жазо чораси белгиланади.

Қонун лойиҳасининг муҳим жиҳатларидан яна бири – **ота-она қарамогидан маҳрум бўлган болалар тоифаси** аниқлаштирилиб, уларнинг ҳуқуқлари кафолатлари ва давлат ҳимояси кучайтирилмоқда. Бунда 3 ойдан ортиқ муддатга ота-онаси хорижий давлатга кетаётган болаларга нисбатан васий ёки ҳомий тайинланиши жорий этилади. Коллаверса, вояга етмаган, меҳнатга лаёқатсиз шахслар ва ота-онани моддий таъминлашдан бўйин товлаш билан боғлиқ ҳуқуқбузарликларни содир этган шахсларга нисбатан «ҳақ тўланадиган жамоат ишларига мажбурий жалб қилиш» тарзидаги янги жазо тури киритилади.

Умуман олганда, мазкур қонун лойиҳасида АҚШ, Буюк Британия, Канада, Германия, Бельгия, Португалия, Сингапур каби илғор хорижий давлатлар тажрибаси асосида болалар ва хотин-қизларнинг таъйиқ ва зўравонликка учрашининг олдини олиш чоралари самарадорлигини ошириш, оила институтини мустаҳкамлаш, маънавий-ахлоқий муҳитни яхшилашга қаратилган бир қатор янги таклифлар илгари сурилмоқда. Хужжатнинг қабул қилиниши таъйиқ ҳамда зўравонликларнинг олдини олиш, оила институтини мустаҳкамлаш, халқаро индексларда мамлакатимизнинг ўрнини яхшилашга хизмат қилади.

Иброҳим ПЎЛАТОВ.

ХАЛҚ КОНСТИТУЦИЯСИ БИЛАН ХАЛҚЧИЛ ДАВЛАТ САРИ!

**БОШ ҚОМУСИМИЗГА ЎЛИМ ЖАЗОСИНИНГ МАН ЭТИЛИШИГА ОИД НОРМАНИНГ КИРИТИЛИШИ
ИНСОННИНГ ЭНГ ОЛИЙ ҲУҚУҚИ — ЯШАШ ҲУҚУҚИНИ ҲАР ДОИМ КАФОЛАТЛАШ БЎЙИЧА
ДАВЛАТНИНГ ҚАТЪИЙ ПОЗИЦИЯСИНИ АНГЛАТАДИ**



2023 йил 30 апрель санасида мамлакатимизда муҳим сиёсий жараён — «Ўзбекистон Республикаси Конституцияси тўғрисида»ги Конституциявий қонун лойиҳаси бўйича референдум ўтказилади. Конституциявий қонун референдум яқунлари Марказий сайлов комиссияси томонидан расмий эълон қилинган кундан эътиборан кучга киради. Газетамиз орқали янгиланаётган Бош қомусимиз бўйича туркум материаллар бериб борилмоқда. Бу гал ҳам муҳим жиҳатларга эътибор қаратамиз.

ЎЛИМ ЖАЗОСИ ТАҚИҚЛАНАДИ

Айрим юртдошларимиз Ўзбекистонда 2008 йилда ўлим жазоси бекор қилинган бўлса, нега Конституцияга ўлим жазоси ман этилишига оид норма киритилмоқда, бунинг нимаси янгилик, деган фикрларни билдирмоқда. Яна айримлар эса ўлим жазосининг ман этилиши жиноятчиликнинг ўсишига олиб келмайдими, деган мазмунда савол йўлламоқда.

Криминолог олимларнинг таъкидлашича, ўлим жазоси жиноятларнинг сабабларини бартараф этишга хизмат қилмайди, яъни бу жазо фақат кўрқитиш йўли билангина қисман профилактика таъсирга эга. Тарихимизда ўлим жазоси баъзан оғир турдаги жиноятларнинг ўсишига сабаб бўлган. Масалан, 1954 йилда собиқ СССРда қасддан одам ўлдириш учун ўлим жазоси жорий этилди. Натижада жиноятчилар жиноий жавобгарликка тортилиш эҳтимолини камайтириш учун нафақат жабрланувчиларни, балки бошқа гувоҳларни ҳам ўлдиришни бошлагани сабабли қотилликлар сони кўпайган. 1961 йилда жавобгарликни оғирлаштирадиган ҳолатларда номусга текканлик учун ўлим жазосининг белгиланиши ҳам бу каби ҳолатларнинг камайтиришига олиб келмаган. Аксинча, номусга тегиш билан боғлиқ қотилликлар сони кўпайган, чунки жиноятчилар ўз қурбонлари келгусида гувоҳлик беришларининг олдини олиш учун уларни ўлдиришган. Янги таҳрирдаги Конститу-

циямизнинг 25-моддасида ўлим жазосининг ман этилишига оид норманинг киритилиши мамлакатимизда инсон ҳуқуқларига ҳурмат, хусусан, инсоннинг энг олий ҳуқуқи — яшаш ҳуқуқини ҳар доим кафолатлаш бўйича давлатнинг қатъий позициясини англаатади.

«СНОС» МУАММОСИ БАРҲАМ ТОПАДИ

Кейинги йилларда республикада қурилиш кўламининг ортиши «снос»лар билан боғлиқ муаммоларни юзага келтирди: фуқароларнинг давлат эҳтиёжлари учун, дея олиб қўйилган ҳовлилари ўрнида кўп қаватли уйлар тикланди. Аммо уйи бузилган фуқароларнинг барчаси ҳам тўлиқ рози қилинмади, қурилиш сабаб кимларнингдир уйига етказилган зарарлар қоплаб берилмади. Вазият шу даражага етиб бордики, қурувчилар ва фуқаролар ўртасидаги зиддият жанжалга айлана бошлади.

Бу воқеалар Бош қомусимизга «снос» муаммосига барҳам бериш билан боғлиқ норма киритиш зарурлигини кўрсатиб берганди. Шу боис янги таҳрирдаги Конституциянинг 47-моддасида айнан «снос» муаммосининг ечими белгилаб қўйилди. Унга кўра, эндиликда ҳеч ким суднинг қарорисиз ва қонунга номувофиқ ҳолда уй-жойидан маҳрум қилиниши мумкин эмас.

Уй-жойидан маҳрум этилган мулкдорга уй-жойнинг ҳамда у кўрган зарарларнинг ўрни қонунда назарда тутилган ҳолларда ва тартибда олдиндан

ҳамда тенг қийматда қопланиши таъминланади. Моддада давлат уй-жой қурилишини рағбатлантириши ҳамда уй-жойга бўлган ҳуқуқнинг амалга оширилиши учун шарт-шароитлар яратиши ҳам назарда тутилган.

ЎҚИТУВЧИ ҚАДРИ ЮКСАЛАДИ

Узоқ вақт давомида ўқитувчилар арзимаган маош учун ишдан ташқари вақтда ҳам мажбурий меҳнатга жалб қилинди. Юқори ташкилот, ҳокимлик ходимлари томонидан мактаблар буйруқбозлик нуқтасига айлантирилди. Бунинг оқибатида педагоглар таълим билан шуғулланиб эмас, ҳисобот юритиш каби турли қоғозбозликни бажариш билан машғул бўлишди.

Янгиланаётган Конституциянинг 52-моддаси билан юқоридагиларнинг барчаси тарихга айланиши мумкин. Унга кўра, Ўзбекистонда ўқитувчининг меҳнати ҳақини ва давлатни ривожлантириш, соғлом, баркамол авлодни шакллантириш ҳамда тарбиялаш, халқнинг маънавий ва маданий салоҳиятини сақлаш, бойитишнинг асоси сифатида эътироф этилади. Давлат ўқитувчилар шаъни ва кадр-қимматини ҳимоя қилиш, уларнинг ижтимоий ва моддий фаровонлиги, касбий жиҳатдан ўсишига ғамхўрлик қилади.

Маълумот учун, янги Конституция лойиҳасининг 50-, 51-, 52-моддалари айнан болаларнинг мактабгача ва мактаб таълимини олишдаги ҳуқуқларни, олий таълим олиш масаласи ҳамда педагогларнинг қонуний манфаатларини ҳимоя қилишга бағишланган.

МАЛАКАЛИ ТИББИЙ ЁРДАМ КАФОЛАТЛАНАДИ

Иссиқ жонмиз, гоҳида тиббий кўмакка эҳтиёж сезамиз. Мана

шу жараёни ҳуқуқий жиҳатдан кафолатлаш учун эса, аввало, Асосий қонун мустаҳкам пойдевор бўлиб хизмат қилади. Ҳўш, янгиланаётган Конституцияда малакали тиббий ёрдам назарда тутилганми?

Конституциянинг 48-моддасида давлат соғлиқни сақлаш тизимини, унинг давлат ва нодавлат шакллари, тиббий суғуртанинг ҳар хил турларини ривожлантириш, аҳолининг санитария-эпидемиологик осойишталигини таъминлаш чораларини кўриш бўйича вазифа олмақда. Ҳар бир фуқаронинг кафолатланган тиббий хизматдан фойдаланиш ҳуқуқини таъминлаш учун соғлиқни сақлаш тизимининг барча жабҳаси давлат томонидан рағбатлантирилиши мустаҳкамланяпти.

Шуни эътироф этиш жоизки, илк мартабада давлат ўз зиммасига аҳоли соғлиғини сақлаш ва ҳаёт сифатини ошириш мақсадида соғлом турмуш тарзини юритиш, жисмоний фаолликни ошириш ва спорт билан шуғулланиш учун шарт-шароитлар яратиш чораларини кўриш мажбуриятини юклямоқда. Бу дегани, аҳоли яратилган қулайликлардан кенг фойдаланиши билан саломатлигини муҳофаза қилади, соғломлашади. Натижада соғлом аҳоли қатлами кўпаяди.

Конституциянинг амалдаги таҳририда ҳар бир фуқаро бепул малакали тиббий хизмат олиш ҳуқуқига эга экани белгилаб қўйилган. Лекин айнан 40-модданинг нормасида соғлиқни сақлаш, фуқаролар тиббий ёрдамнинг кафолатланган ҳажмини қонунда белгиланган тартибда давлат ҳисобидан олиши ҳуқуқи ҳамда мазкур ҳуқуқларни таъминлаш учун давлат ўзига бурч ва мажбуриятларни олиши белгиланмаган эди.

Санжар ИСМАТОВ тайёрлади.

БИЛАСИЗМИ?

Кексалар бепул дори билан таъминланади

Қонунчиликка кўра:

- ўзгалар парваришига муҳтож ёлғиз кексалар ва ёлғиз яшайдиган кексалар ҳар йили бир мартаба санаторийларда бепул соғломлаштирилади;
- шароити оғир ва кам таъминланган кексаларга рецептга асосан 3 ойлик эҳтиёж асосида **дорилар, тиббий ва махсус протез-ортопедия мосламалари** олиб берилади ҳамда жарроҳлик амалиётларининг харажатлари қопланади;
- оғир ташхисли касал ҳамда ногирон кексаларга шифокорлар рецептларига мувофиқ, 3 ойлик эҳтиёждан келиб чиқиб **дори воситаларининг 50 фоизига суммаси** компенсация қилинади;
- кексаларнинг жисмоний тарбия ва спорт билан шуғулланишлари учун **абонемент харажатлари** қопланади;
- давлат театрлари ва музейларига кексалар учун **чипта нархлари тўлиқ қоплаб берилади.**



«ШАҲАР АВТОМОБИЛЛАР ЭМАС, БАЛКИ ПИЁДАЛАР УЧУН»

АГАР АВТОМОБИЛЬ 30 КМ/СОАТ ТЕЗЛИКДА ҲАРАКАТЛАНСА ВА ПИЁДА БИЛАН ТЎҚНАШИБ КЕТГАН БЎЛСА, ПИЁДАНИНГ ОМОН ҚОЛИШ ЭҲТИМОЛИ 90 ФОИЗ БЎЛАДИ. ЛЕКИН ТЕЗЛИК 45 КМ/СОАТ БЎЛСА, ОМОН ҚОЛИШ ЭҲТИМОЛИ 50 ФОИЗГА ТУШАДИ. 80 КМ/СОАТ ВА УНДАН ЮҚОРИ ТЕЗЛИКДА ПИЁДАНИНГ ОМОН ҚОЛИШ ИМКОНИЯТИ ЙЎҚ

2022-2026 йилларга мўлжалланган Янги Ўзбекистоннинг тараққиёт стратегиясини «Инсонга эътибор ва сифатли таълим йили»да амалга оширишга оид давлат дастурига мувофиқ, 2023 йил 1 апрелдан бошлаб, Тошкент ва Нукус шаҳарлари ҳамда вилоятлар ва туманларнинг марказларида транспорт воситалари ҳаракатланишининг энг юқори тезлиги соатига 70 километрдан 60 километргача туширилди.

Хўш, нима учун бу қарорга келинди? Автомобиллар тезлигини пасайтириш йўл-транспорт ҳодисаларини (ЙТХ) камайтирадими?

Жаҳон соғлиқни сақлаш ташкилотининг маълумотларига кўра, дунё бўйича ҳар 24 соғияда 1 киши автоҳалокат туфайли вафот этади. Уларнинг кўпчилиги ёшлар ва болалардир. Автоҳалокатларнинг асосий сабаби — транспорт воситаларининг катта тезликда ҳаракатланишидир. Чунки катта тезликда бошқарувни йўқотиш, бошқа транспорт воситалари билан тўқнашув содир этиш ва пиёдани уриб юбориш эҳтимоли юқори.

2022 йилда мамлакатимиз ҳудудида 10 мингга яқин ЙТХ содир бўлган бўлса, уларнинг 16 фоизи ёки салкам 1,6 мингтаси транспорт воситасини юқори тезликда бошқариш оқибатида содир этилган. Бундан ташқари, ҳодисаларнинг келиб чиқишидаги иккиламчи сабаб — йўл инфратузилмасидаги носозликлардир. Утган йилда содир бўлган 1 194 ЙТХ айнан ушбу ҳолат билан боғлиқ. Демак, транспорт воситаларининг тезлигини пасайтириш орқали юқоридаги ҳолатларнинг деярли 30 фоизининг олдини олиш имконияти яратилади.

Айтиш керакки, автотранспорт воситасининг тезлиги қанчалик баланд бўлса, ҳайдовчига транспорт воситасини тўхтатиш шунчалик қийинчилик туғдиради.

Мисол учун, 50 км/соат тезликда ҳаракатланаётган автомобилни тормозлаш учун 13 метр, 40 км/соат тезликда тормозлаш эса 8,5 метр масофа талаб этилади. Автотранспорт тезлигининг 1 км/соатга ошиши бахтсиз ҳодисалар хавфини 3 фоизга оширади.

Шу боис юқори тезлик автомобилдаги йўловчилар учун ўта хавфли, албатта. Йўл-транспорт ҳодисаси содир бўлган тақдирда, 80 км/соат тезликда бўлган машина йўловчиларининг ўлими хавфи 30 км/соат тезликдан 20 баравар юқори бўлади.

Юқори тезликда ҳаракатланадиган транспорт воситаси, айниқса, пиёдалар ва велосипедчилар учун хатарли ҳисобланади. Масалан, агар автомобиль 30 км/соат тезликда ҳаракатланса ва пиёда билан тўқнашиб кетган бўлса, пиёданнинг омон қолиш эҳтимоли 90 фоиз бўлади. Лекин тезлик 45 км/соат бўлса, омон қолиш эҳтимоли 50 фоизга тушади. 80 км/соат ва ундан юқори тезликда пиёданнинг омон қолиш имконияти йўқ.

Ҳайдовчининг тезлик режими ни танлашда бир нечта омиллар таъсир қилади: ҳайдовчининг ўзига боғлиқ омиллар (*ёши, тажовузкорлиги, мастлиги, автомобилдаги йўловчилар сони ва бошқалар*), йўл ва транспорт воситалари билан боғлиқ муаммолар (*йўл ҳолати, йўл хусусиятлари, транспорт воситасининг ўтказувчанлиги, максимал тезлик чегараси ва бошқалар*),

транспорт оқими ва атроф-муҳит (*зичлик тезлиги, оқим таркиби ва об-ҳаво шароити*) шулар жумласидан.

Хориж тажрибасига назар ташласак, Австрия, Германия, Франция, Буюк Британия, Италия, Португалия, Туркия, Швеция каби ривожланган мамлакатларда аҳоли яшаш пунктларида транспорт воситаларининг юқори ҳаракатланиш тезлиги соатига 50 км. этиб белгиланган. Ёки бўлмаса, Қозғистондаги аҳоли пунктларида чекланган энг юқори тезлик 60 км/соат этиб белгиланган. Тураржойлардан ташқарида рухсат этилган тезлик эса 90 км/соат, пуллик йўлларда 140 км/соатни ташкил қилади. Озарбайжонда чекланган тезлик 60 км/соат, аҳоли пунктларидан ташқарида 70 км/соат ҳисобланади. Қирғизистонда аҳоли гавжум ҳудудларда тезлики 60 км/соатдан ошириш тақиқланади.

Бундай тезлик инсонлар ҳаёти ва соғлигини асрашда муҳим ўрин эгаллаганини ҳисобга олиб, дунё тажрибасидан келиб чиққан ҳолда, Президент фармонида асосан, «шаҳар автомобиллар эмас, балки пиёдалар учун» ғояси асосида Тошкент ва Нукус шаҳарларида ҳамда вилоятлар ва туманларнинг марказларида транспорт воситалари ҳаракатланишининг энг юқори тезлиги соатига 70 километрдан 60 километргача туширилди.


Шу ўринда кўпчилик «Тезликни

пасайтириш одамларнинг қимматли вақти йўқотилишига, йўлларда тирбандликлар ҳосил бўлишига сабаб бўлади», деган фикрни илгари сурмоқда. Айтиш керакки, бу жараёнда инсон ҳаётини асраш — энг муҳим мезон. Шу нуқтаи назардан транспорт воситалари ҳаракатланишининг энг юқори тезлигининг аҳоли гавжум жойларда пасайтирилгани йўл-транспорт ҳодисаларининг олдини олиши, кўплаб инсонлар ҳаётини асраб қолиши муқаррар.

Тирбандликлар кўпайиб бораётгани рост. Бунинг сабаби эса фақат тезлик билан боғлиқ эмас. Бу муаммони бартараф этиш бўйича йўл ҳолати, инфратузилмаси билан боғлиқ ечимлар устида бош қотириш керак.

Умуман олганда, ҳар куни тонгда кимдир ишга, фарзандларини боғча ва мактабларга, яна кимдир бошқа сабаблар билан кўчага чиқиб, кимдир пиёда, кимдир транспорт воситасини бошқариш орқали йўл ҳаракати қатнашчига айланади. Демак, йўл ҳаракати хавфсизлиги — барчамизга дахлдор. Ўзгаришларга бефарқ қараманг, дақиқани ютаман деб, умрга зомин бўлманг!

Бахтиёр ҒОҒУРОВ,
ИИБ Жамоат хавфсизлиги департаменти йўл ҳаракати хизмати йўл инфратузилмасини назорат қилиш бўлими бошлиғи, подполковник.



«ҲАР БИР ХОНАДОН ҲОЛИДАН ХАБАР ОЛЯПМИЗ»

БИР ЙИЛ САРҲИСОБИГА КЎРА, ҲУДУДА 5 ТА МАИШИЙ ХИЗМАТ КЎРСАТИШ ВА САВДО ШОҲОБЧАЛАРИ, ГЎЗАЛЛИК САЛОНИ, ТИКУВЧИЛИК ВА ҚАНДОЛАТЧИЛИК ЦЕХЛАРИ ТАШКИЛ ЭТИЛИБ, 40 ДАН ОРТИҚ ЯНГИ ИШ ЎРИНЛАРИ ЯРАТДИК

Маҳалла раиси сифатида фаолият бошлаганидан буён ҳар бир хонадон, ҳар бир оилага кириб боришни режа қилганман. 2721 нафар аҳолини қандай муаммолар қийнаётгани, қандай орзу ва истаклар билан яшаётганини яқиндан ўрганишни кундалик иш тартибига киритганман.

Ҳоким ёрдамчиси, ёшлар етакчиси, хотин-қизлар фаоли, профилактика инспектори билан туну кун ҳудудимиз тинчлиги, осойишталигини сақлаш, аҳолининг ҳаётдан, турмушдан рози бўлиб яшаши учун биргаликда иш юритяпмиз. Айниқса, нуроний, катта ҳаёт тажрибасига эга ота-оналардан фойдаланиб, ёшларни миллий ва умуминсоний қадриятларга ҳурмат руҳида тарбиялашга эришяпмиз.

Сир эмас, маҳалла — шу ҳудудда яшовчи одамлар дарду ташвишига малҳам бўлувчи маскан ҳисобланади. Шундан келиб чиқиб, ҳар бир хонадонга кириб, фуқаролар ҳолидан хабар оляпмиз. Ижтимоий ҳимояга муҳтож оилаларга аниқ манзилли ёрдам кўрсатиш мақсадида рўйхат шакллантирганмиз. Утган йилда 185 нафар рўйхатга олинган маҳалладошимизга 10 йил ижара асосида фойдаланиши учун ер ажратиб бердик. Натижа-

да шунча одам ишли бўлди, ҳам рўйхатдан чиқди. Битта оилага ҳомийлик асосида 3 хонали уй куриб бердик. Бунинг учун 150 миллион сўм маблағ сарфланди.

Маҳалламизни иқтисодий-ижтимоий ривожлантириш бўйича Наманган, Мусирмонбод, Соҳил, Соҳибкор, Узумзор ва Зобитлар кўчалари ҳудудларида кенг кўламли ободонлаштириш ва кўкаламзорлаштириш ишлари олиб борилди. Хонадонларга 800 тупдан ортиқ мевали кўчатлар тарқатилди.

Бир йил сарҳисобига кўра, ҳудудда 5 та маиший хизмат кўрсатиш ва савдо шохобчалари, гўзаллик салони, тикувчилик ва қандолатчилик цехлари ташкил этилиб, 40 дан ортиқ янги иш ўринлари яратдик. Шу даврда меҳнат ярмаркаларида 7 нафар ёшнинг ишга жойлашишига муносиб ҳисса қўшдик.

Шунингдек, 23 та ёш оила банкдан 510 млн. сўм миқдорида имти-

ёзли кредит олиб, тадбиркорлик фаолиятини йўлга қўйди. 15 та камтаъминланган оилага ҳоким ёрдамчиси билан ҳамкорликда имтиёзли кредит олишда кўмаклашдик. 16 нафар нуроний сиҳатгоҳларда саломатликларини тиклаб қайтишди.

Ҳудуд инфратузилмасини яхшилаш борасида 11 200 метр масофага ичимлик сув олиб келиниши натижасида маҳалладаги 526 та хонадонга оби-ҳаёт кириб борди. 2 та кўчамизга янги трансформатор ҳамда 10 дона бетон устун ўрнатилиб, 650 метр электр симлари янгиланди. Бунинг натижасида 35 та хонадоннинг электр энергиясидаги узилишлар бартараф этилди. Шу билан бирга, ҳомийлик маблағлари ҳисобидан 7,5 млн. сўмлик 3,5 км. ички йўллар шағалланган бўлса, 1 км. электр тармоғи тортилди.

Бир сўз билан айтганда, бирор муаммо ечимсиз қолмаяпти. Маҳалламиз кундан-кун обод ва кўркем-

лашиб, яшаш учун қулай масканга айланиб бормоқда.

Жорий йил 22 март — Маҳалла ходимлари куни зўр шодиёна билан нишонланди. Соҳада ўрнатилган бир гуруҳ касбдошларимиз қаторида менинг меҳнатларим ҳам муносиб қадрланиб, Ўзбекистон Республикаси Президентининг Маҳалла тизими ходимлари куни муносабати билан бир гуруҳ тизим фидоийларини мукофотлаш тўғрисидаги фармонида кўра, «Шухрат» медали билан тақдирландим. Албатта, бу эътироф нафақат менга, балки бутун жамоамизга берилган баҳо, деб ҳисоблайман.

Соҳада фаолият бошлаганимга кўп вақт ўтмаган бўлса-да, бу каби юксак мукофотга муносиб кўрилганим янада куч бағишлади.

Ўткирбек НОРБОВЕВ,
Поп туманидаги «Соҳибкор» маҳалла фуқаролар йиғини раиси.

МАҲАЛЛАБАЙ

Камбағалликни қисқартиришда халқаро ҳамкорлик

Ўзбекистонда камбағалликни қисқартириш ва аҳолини расмий бандлигини таъминлаш мақсадида хорижий илғор тажрибалардан кенг фойдаланишга ҳаракат қилинмоқда.

Жумладан, Халқаро ҳамкорлик доирасида Маҳаллабай ишлаш ва тадбиркорликни ривожлантириш агентлигида масъуллар иштирокида профессор Ҳасан Режабоев ва Темирлан Молдогазиев билан учрашув бўлиб ўтди.

Учрашувда Корея Республикасининг ривожланиш институти тажрибаси асосида Ўзбекистонда камбағалликни қисқартириш ва аҳолини

расмий бандлигини таъминлаш борасида ҳамкорликни йўлга қўйиш бўйича келишиб олинди.

Шунингдек, ҳамкорлик доирасида ҳоким ёрдамчиларининг малакасини ошириш, уларнинг самарадорлик кўрсаткичларини баҳолаш бўйича методологик ёрдам кўрсатиш ва бошқа йўналишлар юзасидан «Ўзаро англашув меморандуми» имзоланди.

Х.АБДУРАҲМОНОВ.



ҲАЁТБАХШ ДАСТУР ТУРМУШНИ БАДАСТИР ЭТЯПТИ



ЙИҒИН ҲУДУДИГА КИРСАНГИЗ, АВВАЛГИ МАНЗАРА БУТКУЛ ЎЗГАРГАН. ЯНГИДАН БУНЁД ЭТИЛГАН МАҲАЛЛА МАРКАЗИ ЭСА ХОДИМЛАРНИНГ ЯНАДА ЎЗГАЧА ШИЖОАТ БИЛАН ИШЛАШИГА ЗАМИН ЯРАТМОҚДА

«Бирлик» маҳалла фуқаролар йиғини — Тошкент вилояти Қибрай туманида жойлашган. Туман марказидан 5 километр узоқликдаги ушбу манзилнинг аввалги шароити ўта оғир эди. «Обод маҳалла» дастури доирасида ҳудудда қурилиш, таъмирлаш ишлари омалга оширилган, йиғин қиёфаси буткул ўзгарди.

Айтиш керакки, 872 та хонадонда жами 3 963 нафар аҳоли истиқомат қилувчи ушбу ҳудуд бор-йўғи икки йил ичида обод бўлиб, кўчалари ўзгача қиёфа касб этди. Маҳалланинг ички йўллари таъмирталаб, уйдим-чуқур бўлиб ётарди. Электр энергияси билан боғлиқ муаммолар одамларнинг тинка-мадорини қуритганди. Тунги ёритиш тизимининг йўқлиги боис одамлар кечаси юришга қийналарди. Ичимлик сув таъминотидаги узиллишларни-ку гапирмай қўяверинг, кунда-кунора шу муаммога дуч келинарди. Ёшларни, ишсизларни ва хотин-қизларни иш билан таъминлаш масаласи энг оғриқли нуқталардан эди.

Фақат бу эмас, алоқа тизимидаги узиллишлар, оқма газ билан боғлиқ муаммолар аҳолини анча ҳолдан тойдирганди. Маҳаллага келган киши борки, бу манзарадан ажабланарди. Хаттоки, маҳалла ходимлари алоҳида бинога муштоқ эди. Улар гоҳ ижара уйларда, гоҳ мактабнинг эскироқ биноларида фаолият кўрсатар, бирор муаммоси бор киши маҳалла фаолларини излаб юришга мажбур эди. «Обод маҳалла» дастури доираси маҳалла инфратузилмаси тубдан ўзгарди. Одамларнинг бир неча йиллик муаммолари ўз ечимини топди.

— Йиғин аҳлини кўплаб муаммолар бир неча йиллардан буён қийнаб келарди, — дейди маҳалла раиси Ориф Толипов. — Йўлларимиз таъмирталаб, алоқа тизимидаги узиллишлар рўй берарди. Одамлар билан ишлаш учун маҳалла марказининг йўқлигини-ку, айтмай қўяқолай. Очиғи, одамларни шу каби муаммолар анча толиқтириб қўйганди. «Обод маҳалла» дастури доирасида маҳалламиз тубдан ўзгарди, кўчаларимиз ўзгача қиёфага кирди. Аҳолини қийнаб келётган муаммолар аста-секин бартараф этилди. Бир неча йиллик орзулар ушалди. Оддий одамларнинг ҳаётга бўлган қарашини ўзгарди. Яшашга бўлган иштиёқни кучайди.

Дастур доирасида янги барча шарт-шароитларга эга бўлган шинамгина фуқаролар йиғини идораси қуриб берилди. Таъмирталаб ҳолга келиб қолган ички йўллар асфальт қилинди. Электр тармоқлардаги узиллишлар бартараф этилиб, юқори кучланишга эга янги трансформатор ўрнатилди. Ҳудуддаги кўчаларнинг барчаси тунги ёритиш чироқлари билан таъминланиб, электр кабеллари тортилди. 1 километр масофада пидедалар йўлакчаси барпо этилди.

Бугунги кунда эскирган, яма-лавериб бутун жойи қолмаган

совуқ сув қувурларини алмаштириш ишлари давом этмоқда. 1,2 километр газ тармоғи, 11 дона газ таксимлаш пункти қайта таъмирланди. Ҳудудда алоқа ва ахборотлаштириш тизимини яхшилаш мақсадида маҳаллага қўшимча 1,5 километр масофада оптик толали алоқа тармоқлари тортилди.

Бундан ташқари, «Аёллар дафтари» ва «Ёшлар дафтари»га киритилганлар, моддий кўмакка муҳтож, ногиронлиги бўлган фуқаролар муаммолари ўрганилиб, ижобий ҳал қилинапти, ишсизларнинг бандлиги таъминланаяпти.

— Ижтимоий ҳимояга муҳтож, ишсиз юрган 8 нафар хотин-қизнинг 3 нафари доимий ҳақ тўланадиган ишларга жойлаштирилди, 5 нафари ўзини ўзи банд қилди, — дейди маҳалладаги ҳоким ёрдамчиси Анвар Жумаев. — Боқувчисини йўқ, эҳтиёжманд аёлларнинг 16 нафарига, ногиронлиги бўлган 13 нафар хотин-қизга, қарамоғида ногирон фарзанди бўлган 8 нафар эҳтиёжманд аёлга 1 миллион 200 минг сўмдан бир марталик ёрдам пуллари берилди.

Дарҳақиқат, маҳаллада камбағалликни қисқартириш борасида тизимли ишлар амалга оширилиб, ўз тadbиркорлигини йўлга қўймоқчи бўлганларга имтиёзли кредит

маблағлари олиб берилаяпти ҳамда уларнинг тadbиркорлик фаолиятини бошлашига кўмаклашиляпти. Мисол учун, Қадрли берк кўчасида яшовчи Гулаш Мамбетова 8 миллион сўм субсидия асосида 1 сотихли томорқасида иссиқхона ташкил қилиб, гулларнинг ноёб навларини етиштириб, мавсумий 10 миллион сўм соф даромад топяпти. У етиштирган гуллар ҳатто бошқа вилоятларда ҳам харидорғир. Ушбу кўчада истиқомат қилувчи Сабина Дарханбаева 33 миллион сўм имтиёзли кредит эвазига зотдор қўйлар олиб, чорвачиликни йўлга қўйган. Бу орқали оиласи даромадига қўшимча даромад киритиб, оиласи камини бутляяпти.

Умуман олганда, маҳалла бугун ўзгача қиёфа касб этяпти. Йиғин ҳудудига кирсангиз, аввалги манзара буткул ўзгарган, янги қурилган йўллар одамларнинг қийинчилигини енгиллатяпти. Янгидан бунёд этилган маҳалла маркази ходимларнинг янада ўзгача шижоат билан ишлашига замин яратмоқда. Tadbиркорлик фаолияти билан шуғулланмоқчи бўлганларга яратилаётган имкониятлар маҳаллада камбағалликни, ишсизлар сонининг камайишига хизмат қилаётир.

М.НУРАЛИЕВ.

МАҲАЛЛАДА НИМА ГАП?

«Мингтепа»да янги шифо маскани иш бошлади

Тошкент вилояти Пискент туманининг чекка ҳудудида жойлашган «Мингтепа» маҳалла фуқаролар йиғини ҳудудида замонавий шарт-шароитларга эга янги оилавий шифокорлик пункти иш бошлади.

Ҳудудда аввал бирорта тиббиёт муассасаси йўқ эди. Аҳоли туман марказида жойлашган шифохонага боришарди.

— Одамлар маҳалламизда оилавий шифокорлик пункти йўқлигидан кўп қийналишган, — дейди «Мингтепа» маҳалласи раиси Шухрат Эшбеков. — Энди аҳолининг узоқдаги шифохона-

ларга боришларига ҳожат қолмади. Бу ерда нафақат бизни маҳалла, балки кўшни «Янгиобод» маҳалласининг 8 мингга яқин фуқароларига бепул тиббий хизмат кўрсатилади.

Шифо масканида аҳолининг саломатлигини доимий назорат қилиб бориш учун кундузги даволаниш хоналари ташкил этилган.





Бир йилдан буён маҳалла раиси лавозимида ишляпман. Мана шу қисқа вақт ичида йиғиндаги муаммоларни хонадонма-хонадон ўрганиб, маҳалла фаоллари билан биргаликда ижобий ҳал қилишга эришяпмиз.

«ЮТУҚЛАРИМИЗ ЗАМИРИДА МАҲАЛЛА АҲЛИНИНГ БИРДАМЛИГИ ЁТИБДИ...»

ҲАММА БИР БЎЛИБ, БИР ЁҚАДАН БОШ ЧИҚАРИБ ҲАРАКАТ ҚИЛСА, ҲАР ҚАНДАЙ ТЎСИҚНИ ЕНГИБ ЎТИШ МУМКИНЛИГИНИ МАҲАЛЛАМИЗ МИСОЛИДА ҲАР КУНИ КЎРЯПМИЗ

Худуддаги узоқ йиллардан буён ўқувчиларга хизмат қилиб келаётган 38-умумтаълим мактаби «Обод маҳалла» дастури асосида 2,5 миллиард сўм маблағ эвазига қайтадан таъмирланди. Қолаверса, йиғинда мактабга қатновчиларнинг сони кўплиги боис қиймати 6 миллиард сўм бўлган, замонавий ўқув ускуналари билан жиҳозланган 300 ўринли янги мактаб қуриб битказилди. Фарзандларимиз битта мактабда эмин-эркин ўқишлиги учун бошланғич синфларни алоҳида, юқори синфларни алоҳида ўқитишни йўлга қўйганмиз.

Ўзгаришлар шу билан чекланиб қолгани йўқ, албатта. Йиғинда фаолият кўрсатиб келаётган, ўз бағрига митти фарзандларимизни жамлаган мактабгача таълим ташкилоти биноси қайта таъмирланди. Шунингдек, худуддаги ички йўлларнинг 1,5 километри асфальт қилинди, лой ва чаң бўлиб ётадиган кўчаларнинг

7 километрга шағал ётқизилди. Тоза ичимлик сув билан таъминланмаган кўчаларга 3,5 километр ичимлик сув қувурлари тортилиб, аҳоли талаби қондирилди. Худуддаги эски симёғочлар ўрнига темир-бетон таянч устунлари ўрнатилиб, тунги чироклар билан жиҳозланди. Улама-улама бўлиб ётган электр симлари мустақкам электр кабелларига алмаштирилди. Йиғин аҳлини электр энергияси билан таъминлаб келаётган 6 та трансформатор қайта таъмирланди, иккита 160 кучланишга эга янги трансформатор ўрнатилди.

Худуд ободлиги йўлида маҳалла аҳли бир чеккада қараб тургани йўқ. Ташаббускорлар савий-ҳаракати билан ҳашар уюштирилиб, маҳалла худудида чиқиндихона ташкил этилди. Шу боис ҳар бир кўча, ҳар бир хонадон саранжом-саришта. Баҳор келиши билан маҳаллаимизда ободонлаштириш ишлари янада

авж олди. Худуддаги ариқлар қазилиб, дарахтларнинг таглари юмшатилади, кексайиб қолган дарахтлар ўрнига янгилари экилади. Энди бу дарахтлар сархил ҳосил бериш баробарида худуд атмосферасини янада яхшилайдди.

Маҳалладаги эҳтиёжманд, моддий таъминотга муҳтож оилалар ҳолидан доимий хабар олишни йўлга қўйганмиз. Аммо халқимизда «ётиб еганга тоғ чидамас» деган пурмаъно гаплар бежиз айтилмаган. Шунинг учун маҳалладаги ишсиз, моддий кўмакка муҳтож фуқаролар доимий ва ҳақ тўланадиган ишларга жойлаштирилди. Тадбиркорлик қилиш истагида бўлганларга ўз бизнесини йўлга қўйишлари учун имтиёзли кредитлар олиб берилиб, бандлиги таъминланди.

Беш уй кўчасида яшовчи Фахриддин Бобониезов маҳалла худудида новвойхона ташкил этиб, йиғин аҳлини нон маҳсулотлари билан таъминлаб келмоқда.

Бу билан у нафақат оиласига қўшимча даромад киритяпти, балки 3 та иш ўрни яратиб, маҳалладошларимизни доимий иш билан таъминлади. Ушбу кўчада истиқомат қилувчи Уктам Сийтимов имтиёзли кредит асосида 3 дона карчер олиб, машиналар ювиш шохобчасини ташкил қилган. Бу ерда ҳам 3 кишининг бандлиги таъминланган.

Бундан ташқари, ижтимоий дафтарларга киритилган йигит-қизларимизнинг бандлигини таъминлашга алоҳида эътибор қаратяпмиз. Ўқиш истагида бўлган хотин-қизларимизни туман бандликка кўмаклашиш марказида ўқитиб, ўқишни тамомлаганлари ўз йўналишлари бўйича ишли бўляпти. Аксариятига субсидия асосида тикув машиналари олиб берилиб, оиласи даромадига қўшимча даромад киритишига кўмаклашиляпти.

«Аёллар дафтари»га киритилган Дилдора Қуранбаева ўз

уйида тикувчилик фаолиятини йўлга қўйиб, буюртма асосида кийим-кечаклар тикмоқда. Бу орқали оиласига кунлик 150-200 минг сўм даромад киритяпти. Ўз уйида тикувчилик фаолиятини йўлга қўймоқчи бўлган фуқаролар ўрганилиб, уларга ўз тадбиркорлигини йўлга қўйишига кўмаклашияпмиз.

Умуман олганда, маҳаллаимиз ободлиги, эришаётган ютуқларимиз замирида маҳаллаимиз аҳлининг бирдамлиги ётибди. Улар ташаббусларимизни қўллаб турмаганда, биз бундай натижаларга эриша олмас эдик. Ҳамма бир бўлиб, бир ёқадан бош чиқариб ҳаракат қилса, ҳар қандай тўсиқни енгиб ўтиш мумкинлигини маҳаллаимиз мисолида ҳар куни кўряпмиз.

Улуғбек КАМОЛОВ,
Гурлан туманидаги
«Беш уй» маҳалла фуқаролар
йиғини раиси.

МАҲАЛЛАДА НИМА ГАП?

Учқудуқда уч авлод вакиллари учрашди

Навоий вилояти Учқудуқ туманининг Кокаяз овул фуқаролар йиғинида «Уч авлод учрашуви» ташкил этилди.

Учрашув аввалида маҳаллада амалга оширилган ишлар, моддий кўмакка муҳтож, ишсиз фуқароларнинг бандлигини таъминлаш ҳақида сўз юритилди. Сухбатлар давомида давлатимиз раҳбари ташаббуси билан жамиятимизнинг ҳар бир аъзосига ғамхўрлик, меҳр-оқибат кўрсатилаётгани, инсон қадр-қиммати, унинг орзу-ниятларини рўёбга чиқаришга имконият яратиб бериш устувор вазифага айлангани, худудда кейинги йилларда рўй бераётган

тарихий ўзгаришлар ва Янги-ланаётган Конституциямизга киритилаётган қўшимчалар тўғрисида маълумот берилди.

— Конституциямизга кўндалб концептуал янги нормалар киритилмоқда, — дейди туман ҳокими С.Ҳамроев. — Жумладан, 20-моддасида давлат органлари билан ўзаро муносабатларда юзага келадиган қонунчиликдаги барча зиддиятлар ва ноаниқликлар фуқаро фойдасига талқин этилиши кафолатланмоқда. Шунингдек, айбсизлик презумп-

циясига аниқлик киритилмоқда. Хусусан, Конституциямизнинг амалдаги 26-моддасида шахснинг иши судда кўриб чиқилиб, унинг айби аниқланмагунча, у айбдор ҳисобланмаслиги белгиланган бўлса, эндиликда 28-моддада суднинг қонуний кучга кирган ҳукми билан аниқланмагунча, у айбсиз ҳисобланиши мустақкамланмоқда.

Тадбир якунида «Қизилқум» маданият уйи бадиий жамоалари томонидан дилтортар куй-қўшиқ ва рақслар ижро этилди.



«БУ ЛАВОЗИМ АЁЛЛАРГА ОҒИРЛИК ҚИЛМАС ЭКАН...»



2022 ЙИЛДА ХАТЛОВ НАТИЖАСИДА 80 НАФАР ИШСИЗ ФУҚАРО РЎХАТГА ОЛИНГАН БЎЛСА, УЛАРНИНГ АСОСИЙ ҚИСМИНИНГ БАНДЛИГИ ИЧКИ ИМКОНИАТЛАР ОРҚАЛИ ТАЪМИНЛАНДИ. ЖУМЛАДАН, 59 НАФАРИГА УЗОҚ МУДДАТ ФЙДАЛАНИШ УЧУН 10 СОТИХДАН ЕР БЕРИЛДИ. 60 НАФАР МАҲАЛЛАДОШИМИЗГА ОИЛАВИЙ ТАДБИРКОРЛИК ЙЎНАЛИШИ БЎЙИЧА ИМТИЁЗЛИ КРЕДИТ АЖРАТИЛДИ

Ҳоким ёрдамчиси вазифасига таклиф этилганимда, аввалига бироз чўчигандим. Боиси бу вазифа аёл кишига оғирлик қилмасмикан, деган ҳадик бор эди. Аммо аёл киши бўлса-да, ўз ишини сидқидилдан бажарса, у ҳар қандай юмушни бажара оларкан. Ўзим тажрибамда бунга амин бўлдим.

Дастлаб режа туздим. Ишсизларнинг бандлигини таъминлаш учун тадбиркорларнинг сафини кенгайтиришга шошилмадим. Балки маҳаллада яшовчи уқуви бор ишбилармонларнинг фаолиятини кенгайтиришга ва янги иш ўринлари яратилишига урғу бердим. Бунда, аввало, тажрибаси бор тадбиркорларга имтиёзли кредитлар ажратилишига кўмаклашдим. Уларга ишсиз, ижтимоий ҳимояга муҳтож оилалар бириктирилди. Устоз-шогирд аънарасини йўлга қўйдик.

Ҳеч қандай бизнес режа тузиши билмай туриб, тадбиркорлик билан шуғулланишни истаган кишига кредит ажратиш самара бермаслиги мумкин. Шунинг учун уларга тадбиркорликдан сабоқ бериб, тўғри йўл-йўриқ кўрсатиб, кейин фаолият бошлашларига кўмаклашилди.

Айниқса, томорқачиликни ривожлантиришга алоҳида эътибор қаратдик. Чунки бу соҳа ривожини одамларнинг яхши турмуш кечириши, кўшимча даромад олиш, озиқ-овқат мўл-кўлчилигига эришиш, оилаларнинг моддий таъминотини яхшилаш ва аҳоли бандлигини

таъминлашда катта аҳамият касб этади. Агар ҳар бир оила ўз томорқасидан унумли фойдаланса, қишлоқ хўжалиги маҳсулотлари билан ўзини ўзи тўла таъминлайди. Натижада уни бозордан сотиб олишга кетадиган маблағни бошқа эҳтиёжларига ишлатиш мумкин.

Қолаверса, ўз эҳтиёжидан ортиб қолган маҳсулотни бозорга чиқарган оиланинг моддий аҳволи янада яхшиланади. Бу йўналишда маҳалламизда бир қатор хонадонлар ўзига хос тажрибага эга. Жами 2 780 нафар фуқаро истиқомат қилувчи маҳалламизнинг асосий «драйвер»и — узумчилик ҳисобланади. Умуман, бирор қарич экин ери бўш қолмайди. 2022 йилда хатлов натижасида 80 нафар ишсиз фуқаролар рўхатга олинган бўлса, уларнинг асосий қисмининг ички имкониятлар орқали бандлиги таъминланди. 59 нафарига 10 сотихдан, 65 нафарига 15 сотихдан узоқ муддатга фойдаланиш учун ер берилди. 60 нафар маҳалладошимизга оилавий тадбиркорлик йўналиши бўйича имтиёзли кредит ажратилди. 2022 йилда 1 нафар жазони ижро этиш муассасасидан қайтган фуқарога субсидия асоси-

да иссиқхона қурдик. Шу орқали унинг бандлиги таъминланди. Бундан ташқари, «Аёллар дафтари»да рўхатда турган 3 нафар ижтимоий ҳимояга муҳтож хотин-қизга субсидия асосида тикув машиналари тақдим этилди. Шунингдек, норасмий тарзда турли касблар билан машғул бўлган 90 нафар фуқаронинг фаолияти қонунийлаштирилди.

Маҳаллада ўз фаолиятини йўлга қўйиб, бошқаларга ҳам ёрдамлашаётган тадбиркорлар кўп. Масалан, яқка тартибда тадбиркорлик билан шуғулланиб келаётган Гулнора Юнусова тикувчилик соҳасида энг олди тадбиркор бўлиб, бугун 60 нафар аёл-қизни иш билан банд қилган.

Алишер Нишонов «Оқбура агро томорқа хизмати — 2022» масъулияти чекланган жамияти асосчиси. У паррандачилик йўналишида фаолият олиб боради. Айни пайтда бу корхонада 16 нафар ишсиз ёшлар бандлиги таъминланди.

Томорқасидан самарали фойдаланаётганлар сафи кенгайиб бормоқда. Хусусан, гулчиликка ихтисослаштирилган хонадонлар сони ортмоқда. Балки шу босими, кейинги пайтда «Ёрқишлоқ»

маҳалласини «Андижоннинг Голландияси», деб аташяпти. Мисол учун, маҳаллада истиқомат қилиб келаётган Санобархон Жалилова 5 сотихли томорқасида лола экиб, 8 млн. сўм даромад олиб, 30 та хонадон эгаларига лола етиштиришни ўргатди. Мавсумдан мавсумга лолдан бўшаган томорқа майдонига помидор, картошка ва карам экиб ҳам даромадини ошириб боради. Шу билан бирга лола пиёзидан яхшигина даромад топади. Санобархон опа билан бир вақтда ушбу маҳалладаги 12 та хонадондаги ихчам иссиқхоналарда лола етиштирилиб, мавсумдан олдин маҳаллий бозорларга етказиб беришни йўлга қўйган. Бу билан даромад ҳам икки хиссага ортди.

Умуман айтганда, зиммамизга юкланган асосий вазифа — куйи бўғинда фуқароларнинг муаммолари билан бевосита шуғулланиб, пиروвардида халқнинг турмуш даражасини яхшилашга ҳаракат қилишимиз.

Ўғилой ҲАМДАМОВА,
Жалакудук туманидаги
«Ёрқишлоқ» маҳалласи ҳоким
ёрдамчиси.

Аҳоли таъминоти яхшиланяпти

Янги Наманган туманидаги «Маънавият» маҳалласида аҳолининг ичимлик сув ва электр таъминотини яхшилаш, йўлларни соз ҳолатга келтириш масалаларига алоҳида эътибор қаратилмоқда.

Бу борада «Муродил вақт инвест» МЧЖ кўмагида 12 км. ичимлик сув тармоғи тортилмоқда. Эски тармоқ тўлиқ янгиланиши натижасида маҳалла аҳолисининг тоза ичимлик сув муаммоси бартараф этилди. Жумладан, 1055 та хонадонга тоза ичимлик суви кириб боради. Эътиборлиси, хайрли ишлар 2023 йилда ҳам давом этмоқда. Маҳалламиз «Обод маҳалла» дастурига киритилиб, 2 км. масофа асфальтланиши, сув йўллари ва электр тармоқлари

янгилиниши белгиланган.

Тумандаги барча маҳалларда олиб борилаётган кенг кўламли бунёдкорлик ишлари Президентнинг «2022-2023 йилларда маҳаллалар инфратузилмасини янада яхшилаш бўйича кўшимча чора-тадбирлар тўғрисида»ги қарори ижроси доирасида амалга оширилаётгани аҳолини бирдек қувонтирмоқда.

Назифа МАМАЖОНОВА,
Янги Наманган туманидаги
«Маънавият» маҳалласи раиси.



МАҲАЛЛАДА НИМА ГАП?

«ИСЛОҲОТЛАР ОДАМЛАР ҲАЁТИНИ ЎЗГАРТИРМОҚДА»



2023 ЙИЛ БИРИНЧИ ЧОРАГИДА 90 НАФАР ЭҲТИЁЖМАНД ХОТИН-ҚИЗЛАР «АЁЛЛАР ДАФТАРИ»ГА РЎЙХАТГА ОЛИНГАН БЎЛСА, БАРЧАСИГА АМАЛИЙ ЁРДАМ КЎРСАТИЛДИ

Ижтимоий ҳимояга муҳтож хотин-қизларни қўллаб-қувватлаш, уларнинг манфаатларини ҳимоя қилиш мақсадида маҳаллаларда «Аёллар дафтари» шакллантирилди. Бу дафтарлар уйма-уй юрган ҳолда, хотин-қизларнинг ҳаёти, муаммо ва ташвишлари ўрганилиб, тузилди. Шу асосида тегишли дастурлар ишлаб чиқилди. Айтиш лозимки, Фарғона вилоятида «Аёллар дафтари»га киритилган хотин-қизларни ижтимоий қўллаб-қувватлашга алоҳида эътибор қаратилмоқда.

Маҳалламизда 2 507 нафар аҳоли бўлиб, уларнинг 1 274 нафари хотин-қизлар ҳисобланади. Айнан «хонадонбай» тизими асосида уларнинг барчаси билан индивидуал ишлашни йўлга қўйганмиз. Хатлов жараёнида алоҳида суҳбатлашиб, орзулари, муаммолари билан ўртоқлашпимиз. Муҳими, шунга мос тарзда кўмак кўрсатяпмиз. Масалан, тиббий ёрдамга муҳтож 10 нафар хотин-қиз ҳудудий поликлиникалар томонидан тиббий кўриқдан ўтказилди. Тиббий таҳлиллар натижасига кўра, 5 нафар хотин-қиз даволаниш учун ордер ҳамда дори-дармон билан таъминланди. Шунингдек, 2022 йилда 80 нафар ишсиз аёлнинг бандлиги таъминланди. 15 нафардан зиёди ҳуқуқий, психологик ёрдам кўрсатилди. «Устоз-шогирд» аъёнани асосида 10 нафар аёл хунармандларга бириктирилди, 7 нафари

тадбиркорлик йўналиши бўйича ўқитилиб, сертификатга эга бўлди.

Айталик, 2022 йил 81 нафар, 2023 йил биринчи чорагида 90 нафар эҳтиёжманд хотин-қизлар «Аёллар дафтари»га рўйхатга олинган бўлса, барчасига амалий ёрдам кўрсатилди. Яъни ўтган йилда 12 нафар, жорий йил 7 нафар хотин-қиз тикувчиликка ўқитилди. Яна шунчасига субсидия асосида тикув машинаси берилди, олий ўқув юртига қабул қилинган 2 нафарининг шартнома пуллари тўлаб берилди. Қолаверса, 8 нафарига 14 сотихдан ер ажратилган бўлса, қолганлари ҳам даромадли ишларга жойланди. 19 нафар боқувчисини йўқотган, 9 нафар ногиронлиги бор ҳамда 7 нафар ногирон фарзанди мавжуд аёлларга моддий ёрдам кўрсатилди.

Бу каби амалий ёрдамлар

оддий одамлар ҳаётини ўзгартирмоқда. Уларда эртанги кунга ишонч ортмоқда. Тикув машинаси берилган хотин-қизлар касб-хунарли бўлиш баробарида, оилаларига кўшимча даромад олиб киришмоқда. Ҳилола Узоқованинг мурожаати ижобий ҳал этилиб, унга «Аёллар дафтари» жамғармаси маблағлари ҳисобидан субсидия асосида тикув машинаси ажратилганди. Ҳозирда тикувчилик билан шуғулланаётган Ҳилола хон оиласи учун кўшимча даромад топмоқда. Шунингдек, маҳалладаги 2 нафар шогирдларига тикувчилик сир-асрорларини ўргатиб келмоқда.

Ҳамида Қодирова маҳалладаги касб-хунар марказида чеварчиликни ўрганди. Уқишни тамомлаши билан унга субсидия асосида тикув машинаси олиб бердик. Эътиборлиси, қисқа вақтда тадбиркорлик фаолиятини бошлаб юборди.

Буюртма асосида келинлар учун хонадонларга парда тикиб, яхши даромад топмоқда. Маҳфуза Самадовага 14 сотих ер ажратиб берилгани ижобий самарасини кўп куттирмади. Боиси бу аёлимиз рўзғор учун етарли маблағ топиб, кўшимчасига ўқишининг шартнома пуллари ҳам ўзи тўламоқда. Барно Ниҳолова ҳам чеварчилик сирларини ўрганиб, буюртма асосида маҳсулот етказиб бермоқда.

Бир сўз билан айтганда, маҳалламизда хотин-қизларга берилган эътибор сабабли оилалар моддий аҳволи яхшиланмоқда. Асосийси, камбағалликни қисқартириб, ишсизликнинг олди олинмоқда.

Хуршида ҚУРБОНОВА,
Риштон туманидаги
«Уйрат» маҳалласи хотин-қизлар фаоли.

МАҲАЛЛАДА НИМА ГАП?

Мурувват ва саховат маросимлари

Рамазон ойи хайру саховат, инсонлар ўртасида меҳр-оқибат ришталарини мустаҳкамловчи муборак ойдир.

Президентимизнинг «Муборак Рамазон ойини муносиб тарзда ўтказиш тўғрисида»ги қарори ижроси доирасида Сирдарё вилоятидаги 239 та маҳаллада эҳтиёжманд, ижтимоий кўмакка муҳтож оилалар вакиллари, рўзадорлар иштирокида меҳр-мурувват ва саховат тадбирлари амалга оширилмоқда.

Сирдарё, Ховос, Сайхунобод, Гулистон, Сардоба туманлари ҳамда Ширин ва Янгиер шаҳридаги маҳаллаларда ёзилган ифторлик дастурхонига «Темир дафтар», «Аёллар дафтари», «Ягона ижтимоий ҳимоя реестри»да турган икки мингдан зиёд фуқаролар таклиф этилди.

Бу каби хайрия тадбирлари, ифторлик маросимлари вилоятнинг барча туман ва шаҳарларидаги маҳаллаларда давом этмоқда.

Мухбиримиз.





«ҲАЗОРАСП»ДА БИРОРТА БЎШ ЮРГАН ОДАМНИ УЧРАТМАЙСИЗ»

«ЁШЛАР ДАФТАРИ»ГА КИРИТИЛГАН 157 НАФАР ЁШГА МАҲАЛЛА ҲУДУДИДАН 10 ЙИЛ МУДДАТГА ҚИШЛОҚ ХЎЖАЛИГИ МАҲСУЛОТЛАРИНИ ЕТИШТИРИШИ УЧУН УНУМДОР ЕРЛАР АЖРАТИЛИБ, УЛАРНИНГ БАНДЛИГИ ТАЪМИНЛАНДИ

Бугун ободлик кириб бормаган маҳалла қолмади. Худудлар қиёфаси аввалгидан буткул ўзгариб, ўзгача қиёфа касб этипти. Шу қаторда худудларда ишсиз юрган, моддий кўмакка муҳтож аҳоли муаммолари ўрганилиб, бандлиги таъминланяпти. Тадбиркорлик билан шуғулланмоқчи бўлган йигит-қизларга ўз бизнесини йўлга қўйишларига кўмаклашиляпти.

Маҳалламиз Тупроққалъа туманининг энг чекка ҳудудида жойлашган. Шунинг учун худудларда бўлаётган ўзгаришлар анча олисрокдамиз. Аммо «олма пиш оғзимга туш», деб қараб тургандан ҳам фойда йўқ. Ўзимиз ўзимизга шароит яратиб, маҳалламизни энг илгор маҳаллалар қаторидан жой олиши учун бор кучимиз билан ҳаракат қиляпмиз. Энг муҳими, йиғинимизда камбағалчиликни олдини олиш мақсадида ишсиз юрганларни доимий ва ҳақ тўланадиган ишларга жойлаштириб, даромади ошишига кўмаклашяпмиз.

Йиғинда 357 та хонадонда жами 2 035 нафар аҳоли истиқомат қилади. 2022 йилда маҳалла аҳли тўлиқ хатловдан ўтказилиб, ижтимоий-иқтисодий аҳволига қараб 4 тоифага ажратилди ва «Йўл харитаси» ишлаб чиқилди. Оилавий тадбиркорлик билан шуғулланмоқчи бўлган 21 нафар фуқарога 491 миллион сўм миқдорда имтиёзли кредитлар олиб берилиб, тадбиркорлик фаолиятини бошлашларига кўмаклашилди. Ўқиш истагида бўлган 53 нафар ишсиз фуқаронинг қизиқишларига асосида ўқитилиб, мутахассисликлари бўйича банд-

лиги таъминланди. Моддий кўмакка муҳтож, кам таъминланган 113 нафар фуқарони тумандаги турли саноат корхоналари билан шартнома тузган ҳолда доимий ва ҳақ тўланадиган ишга жойлаштирдик. 4 нафар ишсиз фуқарога «Саховат ва кўмак» жамғармаси ҳисобидан 17 миллион сўм эвазига турли асбоб-ускуналар олиб берилди. 8 нафарига 8 миллион сўмлик субсидиялар ажратиш учун тавсияномалар тақдим этилди. Бугунги кунда ушбу субсидиялар ҳисобига меҳнат қуроолларини олган фуқаролар ўз уйларига мўмайгина даромад топиб, оиласи даромадига ҳисса қўшмоқда.

Дарҳақиқат, «Аёллар дафтари»даги хотин-қизларнинг бандлигини таъминлаш борасида бир қанча амалий ишлар бажарилди. Жумладан, дафтарга киритилган хотин-қизларимизга тикувчилик билан шуғулланишлари учун «Саховат ва кўмак» жамғармаси ҳисобидан 13 миллион 200 сўм миқдорда маблағлар ажратилиб, тикув машиналари олиб берилди. Мисол учун, Полвон ота кўчасида яшовчи Хосият Курбонбоевага 3,5 миллион сўм эвазига тикув машинаси олиб

берилган эди. Бугун у ўз уйида чеварчилик фаолиятини йўлга қўйиб, оиласи даромадига кўшимча даромад киритяпти. Устоз-шогирд аънанасига мувофиқ, йиғинда тикувчиликка қизиққан хотин-қизларга чеварчилик сир-асрорларини ҳам ўргатиб келяпти. Келажакда бу тадбиркоримиз тикувчилик фаолиятини кенгайтириб, юртимиз ва хориж бозорларига сифатли кийим-кечак маҳсулотларини етказиб беришни режа қилиб турибди. Албатта, биз ҳам бир чеккада қараб турмаймиз. Бу йўлда биз тадбиркоримизнинг режаларини амалга оширишида кўмаклашиб, керакли шарт-шароитлар яратиб берамиз.

Эндигина чеварчилик фаолиятини йўлга қўйган Гурлан кўчасида яшовчи Мунира Дуримова жорий йилда ўз фаолиятини кенгайтириб, маҳалладошларини доимий иш билан банд қилмоқчи. Ушбу кўчада яшовчи «Аёллар дафтари»га киритилган Робия Бекчанова ҳам ўз уйида тикувчилик фаолиятини йўлга қўйиб, нафақат оиласи даромадига кўшимча даромад киритяпти, балки маҳалладаги бўш юрган 3 нафар маҳалладошини иш билан таъминлаб, уларнинг ҳам

ҳалол меҳнат орқали даромад топишларига кўмаклашяпти.

Бундан ташқари, «Ёшлар дафтари»га киритилган фуқароларнинг ҳам бандлиги таъминланяпти. Ишсиз юрган 157 нафар ёшга маҳалла ҳудудидан 10 йил муддатга қишлоқ хўжалиги маҳсулотларини етиштириши учун унумдор ерлар ажратилиб, уларнинг бандлиги таъминланди. Ушбу ажратилган ерларга ёш тадбиркорларимиз мавсумий помидор, бодринг, картошка, сабзи, шолғом каби полиз маҳсулотларини етиштириб бозорларимиз тўқинлигини таъминлаб, ҳалол меҳнати ортидан даромад топяпти.

Умунан олганда, маҳалламизда бугун биронта ҳам бўш юрган одамни учратмайсиз. Ҳамма меҳнат қилиб, оиласига кўшимча даромад киритяпти, қора қозонни ҳалол ризқ билан қайнатяпти. Одамларга яратиб берилаётган имкониятлар ҳаёт йўлини тополмай юрганларга шамчиноқ вазифасини ўтапти.

Ўғилжон ЖУМАНИЁЗОВА,
Тупроққалъа туманидаги
«Ҳазорасп» маҳалла фуқаролар
йиғини раиси.

МАҲАЛЛАДА НИМА ГАП?

Пойтахт ҳокими маҳаллаларни кезди

Тошкент шаҳар ҳокими в.б. Шавкат Умурзоқов бошчилигида ҳоким ўринбосарлари ва бошқа мутасаддилар Чилонзор туманидаги «Боғзор» ва «Оқтепа» маҳаллалари ҳудудида олиб борилаётган ободонлаштириш ва коммунал тизимдаги таъмирлаш ишлари билан яқиндан танишди.

Худудда амалга оширилаётган ишлар билан танишар экан, пойтахт ҳокими тумандаги замонавий талаблар асосида таъмирдан чиқарилган 39-сонли оилавий поликлиникада бўлиб, шифокорлар ва аҳоли учун яратилган шарт-шароитларни кўздан кечирди.

— Аввалги оилавий поликлиника эски, шароитлари ҳам талаб даражасида эмас эди, — дейди «Боғзор» маҳалла фуқаролар йиғини

раиси **Шакар Тожиева**. — Давлат дастури доирасида ушбу оилавий поликлиника қайтадан таъмирланиб, фойдаланишга топширилди. Унда яратилган шарт-шароитлардан одамлар мамнун.

Шу билан бирга, шаҳар ҳокими мутасаддиларга туман ҳудудидан оқиб ўтувчи «Новза» канали қирғоқларини ободонлаштириш бўйича режалаштирилган ишлар юзасидан маълумот берди.



ХОЖА БАҲОУДДИН НАҚШБАНД ҚИЗИЛТЕПАДА ЯШАГАНМИ?



БИЗНИНГ ВАЗИФАМИЗ ЎТМИШ ТАРИХНИ ЧУҚУР ЎРГАНИШ, УЛУҒ АЖДОДЛАРИМИЗ МАДАНИЙ, ИЛМИЙ-ДИНИЙ МЕРОСИГА ҲУРМАТ БАЖО КЕЛТИРИШ, УЛАР ЎТГАН ЙЎЛЛАРНИ ГУЛ-У ГУЛЗОРГА АЙЛАНТИРИБ РУҲЛАРИНИ ШОД ҚИЛИШДАН ИБОРАТ

Бухорода жуда кўплаб азиу авлиёлар яшаб ўтган. Жумладан, Муҳаммад бинни Муҳаммад Баҳоуддин ан-Нақшбанд ал-Бухорий (кўпроқ Баҳоуддин ёки Хожа Баҳоуддин, Балогардон, Хожаи Бузрук, Шоҳи Нақшбанд номлари билан машҳур) 1389 йилда вилоятнинг ҳозирги Когон тумани Қасри Ҳиндувон (кейинчалик Қасри Орифон) қишлоғида туқувчи – нақшбанд оиласида туғилган. Таълимотининг асосида «Дил ба ёру, даст ба кор» («Кўнглинг худода бўлсин-у, кўл иш билан банд бўлаверсин») деган ғоя ётади. Халқ орасида «Балогардон» (яъни дуо билан бало-қазони даф этувчи) унвони билан ҳам машҳур.

Бу улуг алломанинг Қизилтепа туманида яшаб ўтганлари ҳақида тарихий далиллар етиб келган. Тўғри, яшаган вақтларида туғилган жойлари Қизилтепа деб аталмаган. 25–30 ёшларида Зармитан қишлоғи яқинидаги Ревартун қишлоғида яшаганлар. Ул зот истикомат қилган макон ҳозирда Гулҳовуз, деб аталади. Гулҳовуз қадим рус босқинига ҳақ жуда катта боғ, масжид, хонақоҳли макон бўлган. Бу унинг номидан ҳам маълум. Ҳозирда Қизилтепа – Когон йўлидан Гулҳовузгача йўл асфальтланган. Ободончилик ишлари амалга ошириляпти.

Ҳазрат Баҳоуддиннинг Ревартунда бўлганликлари ҳақида «Мақомати Шоҳи Нақшбанд» китобида кўплаб

маълумотлар бор. Яъни ул зот тариқат йўлининг аввалги йиллари айнан шу муборак заминда ўтган.

Хожа Баҳоуддин Нақшбанд бобомизнинг Қизилтепа тумани билан боғлиқлигини далилловчи бошқа маълумотлар ҳам бор. «Гулбоғ» маҳалласи худудида Шайх Шоди қабристони бор. Шайх Шоди Шакарланг Хожа Баҳоуддин Нақшбанднинг она томондан қариндоши – тоғалари экани эътироф этилган. «Маданият» маҳалласининг Ўзбор қишлоғи яқинида Муҳаммад Порсо зиёратгоҳи бор. Хожа Муҳаммад Порсо Баҳоуддин Нақшбанд бобомизнинг суюкли халифаси ва куёвлари бўлганлар. Албатта, бу зиёратгоҳнинг асл ёки рамзийлиги ҳақида маълумот

йўқ. Шу маҳаллада «Пўлотча» зиёратгоҳи бўлиб, аҳоли бу зиёратгоҳни Хожа Баҳоуддин Нақшбанд қизлари номи билан боғлиқ, деб қадрлайди.

Яна бир ривоятда Хожа Баҳоуддин Нақшбанд Ревартунда яшаган вақтларида Зармитан қишлоғи томонга борганларида бир ҳовли эгасидан бир коса сув келтиришни сўраганлари, ҳовли эгаси бир коса ширингина қатиқ чиқариб, иззат-ҳурмат билан узатгани айтилади. Бобомиз қатикни ичиб, ҳузур қиладилар ва «Зармитан зар гардад» (Зармитан зарга – олтинга айлансин) дея дуо қиладилар. Зармитаннинг машҳур қатиғи шундай пайдо бўлган, деган гап ҳам бор.

Хожа Баҳоуддин Нақшбанд

бобомизнинг Ревартун ва Роҳобод билан боғлиқ ҳаётларининг бир қисми тасодиф эмас. Чунки Қизилтепа тумани худуди азалдан улуг авлиёларга бой. Қолаверса, туман худуди қадимги тарихий Бухоро худудининг энг маданий ҳамда илм-ҳунар масканларидан бири, ҳазрат Баҳоуддинга Ғиждувонга, Абдуҳолиқ Ғиждувоний зиёратларига бориш учун энг яқин йўл бўлган.

Бизнинг вазифамиз ўтмиш тарихни чуқур ўрганиш, улуг аждодларимиз маданий, илмий-диний меросига ҳурмат бажо келтириш, улар ўтган йўллари гул-у гулзорга айлантириб руҳларини шод қилишдан иборат.

Раҳим МАҚСУДОВ.

Ипотека кредитини олиш осонлашади

Маълумотларга кўра, сўнги олти йилда мамлакатимиз аҳолиси 5 миллион 500 минг нафарга ўсиб, 36 миллиондан ошди. Уларга муносиб турмуш шароитлари яратиш мақсадида турар жойлар қурилмоқда. Хусусан, 2017 йилдан бошлаб, 326 мингта янги уйлар фойдаланишга топширилган. Бу даврда уй-жой билан таъминлаш аҳоли жон бошига 18 фоизга ошган.

Бунинг учун сўнги уч йилда банклар 210 минг оилага 33 триллион сўмлик ипотека кредитлари ажратган. Эҳтиёжманд 73 минг оилага бошланғич бадал ва фоиз тўловлари учун 1,3 триллион сўм субсидия берилган. Ўтган йили 60 минг хонадонли кўп қаватли уйлар барпо этилди. 31 та худудда «Янги Ўзбекистон» массивларини қуриш дастури бошланди.

Жорий йилда уй-жой қуриш ҳажмини 1,5 баравар ошириб, 90 мингга етказиш режалаштирилган. Шу боис аҳоли ва қурувчилар учун 4 та йўналишда янги енгиллик ва имкониятлар белгиланди.

Биринчидан, кўпроқ аҳолини қамраб олиш мақсадида расмий даромади етарли бўлмаган аҳолига ҳам ипотека кредити олиш имкони яратилади. Уларнинг тўлов қобилиятини аниқлашда банк карта-сидига айланма, ижара, коммунал ва бошқа харажатларга тўланган пуллари ҳам ҳисобга олинади.

Дастлабки бадални кўпроқ тўлаган фуқаролар банкдан арзонроқ кредит олиш имкониятига эга бўлади. Субсидияга ажратилган маблағларни тезроқ ишлатиш учун субсидия хабарномасининг амал қилиш муддати 12 ойдан 4 ойга туширилади. Шу билан бирга, бу ойлар давомида сертификатидан фойдаланмаган фуқароларга субсидия олиш учун яна қайта мурожаат қилиш ҳуқуқи берилади.

Аҳолини арзон уй-жойлар билан таъминлашга қаратилган яна бир лойиҳа – «Менинг биринчи уйим» дастури. Бунинг учун Қурилиш вазирлиги ҳузурида махсус уй-жой компанияси ташкил этилади. Тошкент вилояти Зангиота туманидан 36 гектар ер ажратилиб, 58 та кўп қаватли уй, ижтимоий муассасалар, кўнгилочар масканлар қурилади. Бунда тадбиркорларга савдо ва тижорат майдонларини бозор нархида сотиш орқали уй-жойлар нархини арзонлашти-

ришга эришилади.

Иккинчидан, қурилиш таннархини пасайтириш учун ёғоч, фанера, ёғочли опалубка ва ойнани импорт қилишда 2025 йилга қадар божхона божи бекор қилинади. Юқори маркали цемент бўйича божхона божи имтиёзи яна 1 йилга узайтирилади. Бунинг ҳисобига уй-жой қуриш таннархи 5 фоизгача пасаяди. Пудратчи ташкилотларга қурилаётган уйни қаватма-қават заровга қўйиш ва ҳар бир қавати учун кредит олиш ҳуқуқи берилди. Қурувчи компанияларга ҳар бир кўп қаватли уй учун компенсация ва кафиллик берилади. Банклар берадиган кредитларни давлат томонидан қайта молиялаш амалиёти давом эттирилади.

Учинчидан, уй-жойларнинг ўз вақтида фойдаланишга топширилиши ва харидорғирлигида коммуникация – асосий масала. Шу боис Иқтисодиёт ва молия вазирлиги инфратузилма учун

зарур маблағ ажратади, вилоят ҳокимлари янги массивларда ички йўллари қуради.

Яна бир масала – бугунги кунда кўп жойлардаги қурилишлар уларнинг инфратузилмаси қувватига мутаносиб эмас. Мисол учун, Тошкент шаҳрининг аҳолиси ҳар йили 100 мингга кўпаймоқда, йилига кўшимча 20 минг хонадонга эҳтиёж бор. Шаҳар оқова сув тозалаш иншоотлари қувватидан анча ортиқ юклама билан ишляпти. Шунинг учун энди сув, оқова, электр, газ, йўл инфратузилмасини яхшилашга инвестор-девелоперлар ҳам жалб қилинади.

Тўртинчидан, бу йил 90 мингта уй-жой режаси қурилиш материаллари корхоналари учун катта бозор. Лекин темир-бетон ишлаб чиқарувчи 3 мингта яқин корхонанинг ярмида лаборатория йўқ. Эндиликда барча шундай корхоналарда замонавий лабораториялар ташкил қилинади.

БИЛИБ ҚЎЙИНГ!

СЕНТОБ САЙЁҲЛАРНИНГ СЕВИМЛИ МАСКАНИГА АЙЛАНГАН

**БУГУНГИ КУНДА ҚИШЛОҚДА 30 ДАН ОРТИҚ
ТАДБИРКОРЛИК СУБЪЕКТИ МАВЖУД. НАТИЖАДА
200 НАФАРГА ЯҚИН ИШСИЗ АҲОЛИ, ЖУМЛАДАН, ХОТИН-
ҚИЗЛАР ДОИМИЙ ИШ ЎРИНЛАРИГА ЭГА БЎЛДИ. ЎТГАН ЙИЛИ
БУ ЕРГА 30 МИНГ НАФАР МАҲАЛЛИЙ, 2,5 МИНГ НАФАР ЧЕТ
ЭЛЛИК ТУРИСТЛАР ТАШРИФ БУЮРДИ**

Туризм қишлоқлари... Бугун бундай манзиллар деярли барча ҳудудларда мавжуд. Уларда маҳаллий аҳолининг маданияти, анъаналари ва турмуш тарзи сақланиб қолган. Таҳлилларга кўра, айнан шу жиҳат нафақат хорижлик туристларни, балки ички туризм ихлосмандларини ҳам ўзига жалб этмоқда. Бундай ўзига хос туристик салоҳиятдан эса фойдаланиш зарур.

Навоий вилояти — туристик манзилларга, тарихий ва диққатга сазовор жойларга бой ҳудуд. Айниқса, Нурота тумани табиат мўъжизалари ва муқаддас қаддамжолари билан машҳур. Шу боис бу ҳудудни истиқболли туристик манзиллар қаторида қайд этиш мумкин. Биргина Нурота тоғларининг шимолий ён бағрида, туман марказидан 120 километр узоқликда жойлашган Сентоб қишлоғи ўзига хос табиати, қадимий обида ва зийратгоҳлари билан ҳамisha сайёҳлар эътиборини тортиб келади.

Айтиш кераки, давлатимиз раҳбарининг 2019 йил 15 августдаги «Ўзбекистон Республикасида туризм соҳасини янада ривожлантириш чора-тадбирлари тўғрисида» қарорига асосан, масканни туризм қишлоғига айлантириш мақсадида улкан бунёдкорлик ишлари амалга оширилди. Жумладан, қишлоққа олиб борувчи 5 километр ички йўл таъмирланди. Тунги ёритиш чироқлари ўрнатилди, иккита пиёдалар кўприги, иккита селфи ҳудуд, учта санитария-гигиена шохобчаси, Сентоб қишлоғининг рамзий кириш стеллоси, туристик ахборот маркази қурилди.

— Бу йилги Наврўз айёмини сентобликлар янада кўтаринки кайфиятда кутиб олдилар, — дейди «Сентоб» маҳалла фуқаролар йиғини раиси Мурод Мирзаев. — Боиси яқинда Сентобга расман туризм қишлоғи мақоми берилди. Шунга монанд ҳудуд инфратузилмаси, ободлиги таъминланди. Жумладан, «Обод қишлоқ» дастури асосида қишлоқдаги барча ижтимоий муаммоларга барҳам берилди. Жорий йилда мавжуд имкониятларимизни янада ошириб,

меҳмон уйлари, хостеллар сонини икки баравар оширамиз. Энг муҳими, бу ерга келувчи маҳаллий ва хорижий сайёҳлар сонини 500 минг нафарга етказишни мақсад қилганмиз.

Дарҳақиқат, бугунги кунда қишлоқда 30 дан ортиқ тадбиркорлик субъекти мавжуд. Натижада 200 нафарга яқин ишсиз аҳоли, жумладан, хотин-қизлар доимий иш ўринларига эга бўлди. Қишлоққа мунтазам равишда Англия, Франция, Австрия, Россия ва бошқа давлатлардан хорижий сайёҳлар оқими кузатишмоқда. Жумладан, ўтган йили 30 минг нафар маҳаллий, 2,5 минг нафар чет эллик туристлар ташриф буюрди.

Бу қишлоққа маҳаллий ёки хорижий сайёҳларнинг келиши кеча ёки бугун кузатилаётгани йўқ. Қишлоқнинг сўлим табиати йил-ўн икки ой барчанинг диққатини ўзига тортади. Бир марта келган киши яна келишни ният қилади. Бунинг учун меҳмон уйлари ва хостелларда етарлича шароит яратилган. Мисол учун, ҳозир қишлоқда 20 та оилавий меҳмон уйи ва 3 та хостел фаолият кўрсатмоқда. Уларга белгиланган стандартлар асосида меҳмон уйлари номи туширилган кўрсаткичлар ўрнатилган. Айни дамда туризм қишлоғида 15 дан ортиқ туристик хизмат йўлга қўйилган.



Мазкур қишлоқда яшовчи Бобоевлар оиласи 2008 йилда «Обичашма» меҳмон уйини очиб, бугунги кунга қадар туристларга хизмат кўрсатиб келмоқда. Бу ерда сайёҳларнинг нафақат дам олиб, қишлоқ табиати билан танишиши учун, балки умумий овқатланиш ва ётоқдан ташқари, тоғлар бўйлаб саёҳатларни ташкил этиш хизмати ҳам йўлга қўйилган.

— 2008 йилда меҳмон уйи очиб, тоғ ёнбағридаги табиий булоқ сувидан баҳраманд бўлишни истовчилар учун хонадонимизда қулай шарт-шароит яратдик, — дейди Шаҳригул Бобоева. — Ишни бошлашдан олдин меҳмонларни қандай кутиб олиш кераклиги, уларга қандай шароитлар яратиш, хуллас, билмаганимизни ўргандик. Ахир бизнес деганининг ўзи бўладими?! Маҳалла ва туман мутасаддилари ёрдамида ҳаш-паш дегунча ишларимиз юришиб кетди. Мана, ҳозир оилавий меҳмон уйимиз 15 йилдан буён ишлаб турибди. Даромадимиз етарли, оиламиз тўқин, бировдан кам жойимиз йўқ. Швейцария, Франция, Англия ва бошқа кўплаб хорижий давлатлардан келувчи сайёҳлар доимий мижозларимиз. Ҳар йили 300–400 кишига хизмат кўрсатамиз.

Айтиш кераки, қишлоқ нафақат сўлим табиати билан, балки маданий мерос объектлари ва диққатга сазовор жойлари билан ҳам эътибор марказида. Эски кўрғон қолдиқлари, қадимги қалъа, қадимий ғорлар, денгиз сатҳидан 1 650 метр баландликдаги Фозилмон кўли, Сентобтепа маданий мерос объекти, қадимий қоятош суратлари туширилган петроглифлар, Сентоб шаршараси кабилар ҳар доим бу ерга ташриф буюрувчиларни қизиқтириб келган.

Умуман олганда, мазкур қишлоққа бир бора келган киши қайта-қайта келгиси келаверади, олам-олам таассуротлар уни яна ўз бағрига чорлайверади. Табиатнинг хушманзарасини ўзида жамлай олган Сентобда келгусида хизмат турларини янада кенгайтириш, экстремал туризмни ривожлантириш, меҳмон уйлари кўпайтириш орқали сайёҳлар сонини ошириш кўзда тутилган. Энг муҳими, бунинг учун барча шароитлар етарли.

Муҳаммад Али ИБРОҲИМОВ.



ФИТР САДАҚАСИ КИМЛАРГА, ҚАЧОН ВА ҚАНЧА МИҚДОРДА БЕРИЛАДИ?

Фитр садақаси рўзадан чиқиш муносабати билан бериладиган садақадир. У рўздор учун Рамазон ойи давомида айтган беҳуда гап-сўзлари, қилган хато ва камчиликларини ювиш ҳамда камбағал-мискинларга таомланиш имконини бериш мақсадида жорий қилинган. Ҳанафий мазҳабида фитр садақаси вожиб амал ҳисобланади.

ҚАЧОН БЕРИЛИШИ КЕРАК?
Фитр садақасини Рамазон ҳайити кунини тонг отгандан бошлаб ҳайит намозига чиқишдан олдинги вақтга қадар бериш вожиб ҳисобланади. Рамазоннинг аввалидан берилса ҳам бўлади.

Аммо Ҳайит намозидан кейинга қолдирмаслик керак. Агарда киши фитр садақасини ийд намозигача бера олмаса, намоздан кейин беради, лекин савоби Рамазон вақтида берганчалик бўлмайди, аммо бериши шарт. Яъни уни беролмай қолган киши зиммасида фитр садақасини бериш вожиб бўлиб қолаверади.

КИМЛАР БЕРИШИ КЕРАК?
Мусулмон эркакга аёл, балоғатга етган-етмаган, хоҳ оқил, хоҳ мажнун бўлсин, нисоб эгаси бўлсалар зиммаларига фитр садақасини бериш вожиб бўлади. Узида пул йўқларнинг номидан уларга нафақа бериш лозим бўлган шахслар беради.

Шунга ҳам диққат қилиш керакки, киши балоғатга етган фарзандлари ва

хотини учун фитр садақа бериши вожиб эмас. Агар балоғатга етган фарзандлари ва аёли учун, улар айтишмаса ҳам, фитр садақасини берса, улар зиммасидан фитр садақаси соқит бўлади.

Ҳайит кечаси туғилган чақалоқ учун ҳам отаси фитр садақа бериши вожиб бўлади. Ҳомила ва ҳайит кунидан олдин вафот этганлар учун эса вожиб бўлмайди.

КИМЛАРГА БЕРИЛАДИ?
Фитр садақаси мусулмон камбағал-мискинларга берилади. «Фатавои Ҳиндия» китобида келтирилишича, фитрни беришда энг афзали, аввало, (камбағал) ака-ука, опа-сингиллар ҳисобланади. Сўнгра уларнинг фарзандлари. Улардан кейин амаки-аммалар, сўнгра уларнинг фарзандлари. Тоға-холалар ва уларнинг фарзандлари сўнгра юқоридегилардан ташқари қариндошлар. Улардан кейин қўшнилари, касбдошлар, кейин ҳамшаҳарлар ёки қишлоқдошлар ҳақли ҳисобланади.

КИМЛАРГА БЕРИЛМАЙДИ?
Фитр садақаси нисоб миқдорича моли бўлган бой кишига, ўзининг ота-онаси, бобо-момосига, ўзининг ўғил-қизларига ва уларнинг фарзандларига, эр-хотин бир-бирига бериш мумкин эмас.

Шунингдек, ғайридинларга, фикс ишларини очик-ойдин қилиб юрвчи фосиққа, бойга, соғ-саломат ва ишлашга қодир бўлатуриб ишламай юрганга бериб бўлмайди. Бундан ташқари, гуноҳ ва маъсиятга, шунингдек мусулмонларга зарар келтирадиган ҳар қандай ишларга сарфлайдиган кимсаларга берилмайди.

Фитр садақаси муҳтожларнинг қўлларига мол сифатида берилиши лозим. Бу пуллар масжид қурилиши, умумий хайрия ишлари учун берилиши жоиз эмас.

РЎЗА ТУТМАГАНЛАР ҲАМ ФИТР САДАҚАСИНИ БЕРАДИМИ?
Бирор узр сабабли рўза тута олмаганлар ҳам ўзлари ёки улар номидан нафақа бериши керак бўлган одам фитр садақасини бериши керак.

ҚАНЧА МИҚДОРДА БЕРИЛАДИ?
2023 йил учун ҳар бир жон бошига фитр садақасининг миқдори:
✓ 2 килограмм буғдой – 12 000 (ўн икки минг) сўм;
✓ 4 килограмм арпа – 20 000 (йигирма минг) сўм;
✓ 2 килограмм майиз – 100 000 (юз минг) сўм;
✓ 4 килограмм хурмо – 180 000 (бир юз саксон минг) сўм деб белгиланди.
Ҳар ким ўз имкониятига қараб ушбу тўрт маҳсулотнинг хоҳлаган бир туридан фитр садақасини берса kifоя.

Эслатма! Фитр садақаси қийматлари Тошкент шаҳар бозорларидаги нархга асосан белгиланган бўлиб, ҳар бир вилоят ўз бозорларидаги нархга қараб фитр садақасини белгилайди.

Жасурбек РАУПОВ,
Тошкент вилояти бош имом-хатиби.

«Аёли эъзозланган юрт»

Қашқадарё вилоятида айни шу шиор остида хотин-қизларнинг ижтимоий-сиёсий фаоллигини оширишга бағишланган маънавий-маърифий, маданий тадбирлар ўтказилмоқда. Унда лидер ва тадбиркор аёллар, «Оқида аёллар» ҳаракати аъзолари, фахрийлар, маҳаллалардаги хотин-қизлар фаоллари, «Аёллар дафтари»га киритилган аёллар ва отинийлар иштирок этмоқда.

Қарши шаҳрида ўтказилган шундай тадбирда мамлакатимизда оила ва хотин-қизларни қўллаб-қувватлаш борасида олиб борилаётган ислохотлар ҳақида сўз юритилди. Янги Ўзбекистоннинг янги тахрирдаги Конституцияси лойиҳасида гендер тенглик, оила мустаҳкамлиги, таълим тизими ва ўқитувчилар ҳуқуқлари акс этган алоҳида моддалар киритилаётгани таъкидланди.

— Бу каби тадбирларни ўтказишдан асосий мақсад — аёлларнинг ижтимоий-сиёсий фаоллигини юксалтириш, уларнинг жамият ва оиладаги мавқеини янада оширишга қаратилган, — дейди вилоят ҳокими ўринбосари, оила ва хотин-қизлар бошқармаси бошлиғи Комила Каримова. — Қола-

верса, тадбир иштирокчиларига янгиланаётган Конституция, унинг мазмун-моҳияти, хотин-қизлар ҳақ-ҳуқуқлари ҳимоясини мустаҳкамлаш бўйича белгиланган модда ва нормалар ҳақида кенг маълумотлар беришга ҳаракат қилдик.

Тадбир доирасида иқтидорли қизлар, катта ҳаётий тажрибага эга нуроний онахонлар, намунали оилалар вакиллари, оқида аёллар, «Аёллар дафтари»га киритилиб, кўмак олган ва ўз мақсади йўлида муваффақиятга эришган аёллар билан мулоқотлар ташкил этилди. Ватан, тинчлик, аёлни тараннум этувчи рақс, куй ва кўшиқлар барчага кўтаринки кайфият улашди.

Шоҳиста БОЗОРОВА.

МАҚАЛЛАДА НИМА ГАП?



Ўзбекистон Республикаси Президенти Администрацияси ҳузуридаги Ахборот ва оммавий коммуникациялар агентлиги томонидан 2019 йил 24 сентябрда 0019 рақами билан давлат рўйхатидан ўтказилган.

Бош муҳаррир
Бахтиёр АБДУСАТТОРОВ
Ижодий гуруҳ:
Санжар ИСМАТОВ,
Хайрулло АБДУРАҲМОНОВ,
Мансурбек ЖАББОРОВ
Дизайнер:
Абдулазиз АҲМЕДОВ

Mahalla
Ижтимоий-сиёсий, маънавий-маърифий газета

МУАССИС:
«Mahalla» nashriyot-matbaa uyī» МЧЖ

Тахририят манзили:
Тошкент шаҳри, Мустақиллик шох кўчаси, 59-уй.
Индекс: 100192
Телефонлар:
Қабулхона: 71 233-39-89,
Обуна бўлими: 71 233-10-92.
Баҳоси келишилган нархда.
Нашр кўрсаткичи: 148

«Шарқ» нашриёт-матбаа акциядорлик компанияси босмахонасида чоп этилди. Босмахона манзили: Тошкент шаҳри Буюк Турон кўчаси 41-уй.
Ўлчами — А3, 4 босма табоқ.
8 450 нусхада чоп этилди.
Буюртма №: Г-418
Газета тахририят компьютер марказида саҳифаланди ва офсет усулида босилди.

